

東

華

續

錄

臣王先謙敬編

臣陶濬宣恭校

秋七月庚辰朔享太廟○諭軍機大臣等本日據常清奏回匪滋事請派令前往會同剿堵等語此次回匪滋事各城派兵堵剿其土爾扈特等處官兵三千名經裕瑞管帶出境剿辦常清熟悉口外情形既據聲請前往會同剿著卽准其折回會同裕瑞管帶土爾扈特官兵相機進剿並商同法福禮慶英由葉爾羌一帶探明何路緊要卽由何路進剿毋得株守一隅致令該匪蔓延將此由五百里各諭令知之○辛巳諭內閣前因御史吳焯奏江南糧臺委員蒙混侵蝕各弊當交何桂清趙德輒查奏茲據和春會同該督撫奏稱裁汰冗員隨時察看並請分別勸懲以挽積弊等語嗣

後糧臺各員果能潔己奉公實心辦事自應覈其勞績奏請獎敘至辦理不善各員除查無侵吞入己情弊者仍照例參辦外其有營私舞弊剋扣侵漁該大臣等查有實據無論官階大小著一面奏聞卽將該員以軍法從事以儆其餘○壬午諭內閣惠親王等奏遵議散放八旗賑米一摺著照所請八旗滿洲蒙古漢軍暨內務府三旗每日每旗各領米六石由戶部籌撥各該旗都統酌量戶口多寡分成散放並著查旗御史會同各該旗都統副都統輪往監視以昭覈實見在米價昂貴八旗生計維艱若俟至九月始行散放恐不足以資接濟著各該旗於酌定章程後自本月起卽行散放以示朕恩膏速沛至意至八旗官紳中有願捐貲助賑者卽照所議令赴捐銅局及火器營上兌另款收存以備採買米石之用○諭軍機大臣等據惠親王等奏風聞吉林所屬地方近來

糧石甚賤惟陸運至海腳價過多查有遼河一帶東股自吉林圍場山內發源流至昌圖地面與西股匯流曲折入海載糧二三百石之船尚可運行惟自匯流以上東股水淺恐大船難行若能用小船剝運則該處糧石可以出境等語見在京師糧價昂貴民食維艱必須豫籌糧石寬爲儲備著慶祺景滄會同查明吉林與盛京通舟河道如可運載糧石直達海口並無阻礙或籌款採辦或招商販運該將軍等卽行妥議奏明辦理將此各諭令知之○諭官文胡林翼奏水陸布置情形並疊次堵勦獲勝一摺武漢黃州等處水陸要隘均經官文等派撥精兵扼守皖賊無從上竄並於黃梅等處連日接仗獲勝辦理尙屬周妥李孟羣一軍既可無庸折回其王鑫等兵勇前因在吉安勦匪得手諭知耆齡斟酌情形或俟吉安克復再令該員赴楚此時楚北軍情較緩且江西先派

李續宣南勇到營兵力已敷堵勦所有王鑫劉騰鴻各軍著官文
胡林翼卽日行文知照耆齡毋庸折回湖北至蘄水等處賊匪非
痛加勦洗不足以杜其窺伺九江小池口頓兵日久亦應迅速進
攻胡林翼到黃州後重振軍威卽著督飭兵勇迅速籌辦毋再延
緩將此由六百里諭令知之○諭福濟等奏餉需久缺請飭淮海
各關按月委解等語皖省廬巢和滁壽潁各處見存兵勇合計尙
有二萬每月需餉十餘萬兩兼須分給李孟羣一軍而指撥各省
之款解到無幾亟應量爲協濟著何桂清趙德轍酌量情形不必
拘定淮海各關如有可以移緩就急之項卽迅速籌撥銀數萬兩
派員解交福濟軍營以資接濟將此由六百里諭令知之○諭福
濟等奏皖省兵餉兩絀急難進勦一摺據稱廬巢和滁壽潁各處
見存兵勇尙有二萬餉需無款可籌請飭山陝各省及淮海各關

按月如數委解等語山陝兩省撥解廬州餉需雖未能如數而按
月二三萬兩尙無貽誤見在京餉及揚州湖北之餉皆取資於該
二省近以回疆滋事復令撥餉數十萬兩是該二省解款甚多未
便專爲廬州再事嚴催本日已諭知何桂清趙德轍不必拘定淮
海各關趕緊籌銀數萬兩解往廬營此項餉銀解到即可分撥李
孟羣行營以資接濟李孟羣一軍本係赴援廬州且已行入皖境
豈能不由皖省接濟本日據官文奏已撥銀二千兩解往並有兵
勇潰赴漢陽就食之語福濟竟稱無項分給將聽其紛紛飢潰隔
膜視之耶至德興阿咨調吉林等處官兵一節福濟株守梁圓既
稱難以進剿則畱兵亦止爲防守之計見在德興阿軍營正當會
攻突厥之際仍著飭令撥回以資攻剿將來瓜鎮兩處克復尙可
分兵赴皖以圖大舉此時自當先其所急不應以有用之兵徒事

防堵也將此由六百里諭令知之○癸未諭內閣上年入秋以後近畿一帶時見飛蝗旋據直隸等省奏報亦各有飛蝗停落之處疊經降旨嚴飭地方官吏認真撲捕原慮蝻孽滋生致傷禾稼是以古來捕蝗之法或付之烈炬或填之深溝總以不留餘孽爲要務近聞各省被災之處民間訛稱蝗爲神蟲不肯撲捕鄉愚無知殊爲可憫著通諭各省督撫飭令地方官一體出示曉諭如遇飛蝗入境無論是否傷稼務須盡力搜捕勿得惑於俗說任令蔓延至會典所載劉猛將軍爲驅蝗正神於雍正年間會奉 諭旨飭令各省建廟致祭上年飛蝗四起秋稼未傷今年春夏各省奏到蝻孽滋生處所或並未停落或收捕潛消並有經雷雨埽蕩無蹤者此皆靈爽驅除默爲呵護應如何酌量加增致敬之處著禮部覈議具奏○甲申諭內閣聯順身任大員於奉旨飭令交出之家

人遷延不交已逾三日顯有隱匿情弊殊屬可惡咎由自取聯順
著先行解任質訊並派端華僧格林沁卽日前往將該員家產查
鈔母任隱匿寄頓○乙酉諭內閣御史曹登庸奏學政渝樾出題割
請飭查辦並將所出試題開單呈覽一摺河南學政渝樾出題割
裂致令文義難通據該御史開列二十題俱係不成句讀荒謬已
極至所稱科試郊縣童生文題誤出破句幾致罷考按試河南府
時坐索棚規逗留三日均屬有玷官箴渝樾著卽革職交英桂督
同藩司瑛棨將所參各款秉公查辦據實具奏毋稍徇隱○諭李
孟羣奏官軍收復霍山縣城一摺李孟羣一軍自入安徽攻克英
山縣城當經諭令乘勝進攻霍六該藩司督率兵勇進抵霍山城
下於六月初三四等日出隊攻勦卽收復縣城所辦尙屬得手仍
著該藩司督軍進克六安漸清皖境○袁甲三奏鄧圩之賊本爲

三圩領袖兇惡巨匪多聚於此並有龔逆派來總管三圩之首逆李寅尤屬異常狡悍必須極力勦洗當與史榮椿朱連泰等籌商飭令各營接連挑濠一道寬深均約八尺並於沿濠搶築月牆牆上密開礮眼由下轟擊四面礮臺由上轟擊賊已無可躲避正在督辦閒探聞籬笆集宮吉寺等處游匪糾約悍黨欲入鄧圩接應因無路繞越悉在附近姚圩之龐莊聚踞希圖牽掣我兵遂於五月二十八日四更時出隊疾往衝擊該匪猝不及防倉皇四竄立時殲斃三百餘名旋據報捻首劉老淵等復勾結南路竄賊欲赴鄧圩應援行至楚店集遺其心腹捻首張廷程倫等先至龐莊豫爲布置適被官兵擒斬餘眾聞風驚潰有竄往東北一帶之說六月初九日趙旗屯上下有馬步賊匪兩股一由東來鈔截大營一向西去搶奪運糧船隻經臣密派侍衛梁畏三等於初十日黎明

出隊行至趙旗屯之虞家樓遇賊接仗斃匪八九十名一面派知府銜田良等乘夜出隊初十日行抵廟集東南之戴家樓適與西竄之匪相值我軍分投鈔擊斃賊百餘人該逆折而南竄於十二日直撲朱連泰營盤臣嚴飭各卡併力防守並派各營鈔擊賊卽潰退據獲賊供稱劉逆糾合李月餘黨意圖南竄復爲英桂之兵阻截恩促折回闖入宗家圩內希圖占踞等語正擬乘夜往勦詎該匪復於十三晚間悉眾來撲得勝營經臣飛調兵勇由外堵截斃賊數百名餘眾驚逃我兵追至圩根斃賊甚多其未及入圩者斬擒淨盡復飭附近宗圩練總高錫齡等於十四日直撲宗圩斬擒多名十五日劉逆等復在姚圩附近之李入莊王小莊另營兩窟圍與姚圩聯絡一氣當派知府徐曉峯等帶領兵勇於四更時出隊先至李入莊賊眾正在紛紛築壘見兵卽竄我軍立將圩身

平毀旋即進攻宗圩毀其圩牆埽蕩餘孽而回自是鄧圩之賊知外援已絕圩中糧食俱盡互相搶奪時聞內訌臣察探賊情實已

窮蹙二十二日正欲逼圩直進忽見賊旗一律拔去圩門自開被

脅圩民將逆首李寅並本圩逆目鄧大渭鄧長清等及著名悍賊

劉破頭等三十五人悉數縛獻跪求乞命當飭史榮椿等分別辦

理並將賊圩燒毀二十五日進攻姚圩忽見圩內逸出二百餘人

皆已薙髮懇求立功贖罪臣察其情詞懇摯因諭令將附近姚圩

之王小莊新圩幫同官兵攻破方准免罪二十六日該圩民隨同

兵勇將王小莊立時攻破斬殺甚多餘匪向東逃竄查鄧王姚三

圩負嵎抗拒前雖將王圩攻破而鄧圩負固異常姚圩尙勢難遠

及復有另股賊匪添踞三圩四面環擾幾有應接不暇之勢仰賴

皇上天威半月之內不惟新舊五圩一氣埽蕩且著名巨惡亦

悉數就擒洵足大快人心總兵史榮椿朱連泰前奉諭旨俟攻勦
三圩完竣再行加恩優獎見在鄧圩姚圩均已蕩平可否卽沛恩
施恭候 欽定 上諭袁甲三勦賊疊勝連破鄧姚兩圩生擒逆
首並將另股賊匪各圩一律毀平袁甲三調度有方此次勦撫兼
施辦理尤爲妥協著加恩賞戴花翎以示獎勵○諭軍機大臣等
李孟羣一軍由湖北赴援廬州疊次克復城池見擬進攻六安惟
軍餉缺乏士卒飢疲湖南勇已散去二千餘人雖經截令歸伍募
勇充補而餉需不繼潰散堪虞該藩司見在六安廬州餉道尚未
能通前經官文英桂各解銀三四千兩接濟業經散放無存著英
桂再籌銀三四萬兩就近解赴李孟羣軍營俟有由豫解赴廬州
之餉准其截畱扣還此路兵勇攻勦頗能得力於皖豫兩省大局
攸關英桂接奉此旨務卽迅速籌撥毋許延誤至所請飭撥馬隊

官兵助勦等語見在各路馬隊惟容照所帶五百名近在宿州著英桂酌量情形如宿州見在防勦稍鬆卽飭容照帶領馳往六安協同李孟羣攻勦將此由六百里諭令知之○諭李孟羣奏克復霍山縣城擬攻六安附陳勇糧缺乏並請飭撥馬隊等語該藩司自英山進勦後疊次獲勝見當糧匱勇飢猶能激勵軍心使士卒忘其飢疲團練樂於效命旬日之間卽將霍山縣城克復調度允合機宜六安州逆匪聞有窮蹙之勢仍當乘機進勦與廬州官軍會合庶可次第殲除疊經諭知福濟分撥餉銀總未能設法疏通道路以致勇多散去雖據官文等奏委解銀二千兩前往接濟亦恐杯水車薪難資挹注本日復諭英桂撥銀三四萬兩解赴李孟羣軍營俟各省解皖餉銀經過豫境再行截畱扣抵諒必能就近協撥至所請添撥馬隊並諭英桂酌量情形如宿州賊勢稍鬆卽

飭容照帶領馬隊五百名前赴該藩司軍營助勦李孟羣務當先就見有兵力急圖攻勦六安迅拔州城期與福濟等會合進兵剪此醜類將此由六百里諭令知之○以廣福爲理藩院尚書前烏魯木齊都統

噶木

○以攻勦安徽鄧圩等處賊匪出力擢總兵官史榮椿爲提

督賞總兵官朱連泰巴圖魯名號子陣亡理問銜江繼陶等祭葬

世職○丙戌諭軍機大臣等本日據海樸培成奏和闐軍臺被擾

文報不通各一摺喀什噶爾回匪滋事葉爾羌東路軍臺業經梗

阻和闐草地所設軍臺專通文報關繫甚重乃該匪復敢於坡斯

坎木軍臺肆行擾亂以致文報不通和闐距該臺六站兵力甚單

培成見飛咨海樸將葉爾羌前調應援後路官兵酌撥數百名由

草地馳赴和闐順道迎擊喀喇沙爾烏嚕木齊派往葉爾羌應援

官兵已於六月初八尤等日啟程不日均可行抵阿克蘇即可酌

撥前往和諭免致由葉爾羌再行折回南路徒費時日該處布嚕特回匪醜類無多不難驅逐出卡肅清道路並著法福禮酌量派兵協剿以期一鼓殲除再昨據樂斌奏餉糈支絀請飭迅速進剿撙節軍需等語近年甘餉支絀此次剿辦回匪雖經飭令各省撥銀爲數不下五十萬但恐一時未能湊集前經批諭扎拉芬泰今昔情勢迥異不能動云成案諒已遵照撙節辦理海樸見辦糧臺一切俱當覈實未可令帶兵員弁浮冒開銷至軍務一日不了軍糈一日難停尤在法福禮等統兵大員相機進剿迅速奏功以慰朕望將此由五百里各諭令知之○戊子烏勒洪額等奏俄人駛抵天津停泊海口不聽間導堅欲投文止得將文書接收該國人卽回帆他往約於本月二十日仍回天津候信○己丑諭內閣英桂奏勦辦襄樊竄克復鄧州內鄉兩城股匪殲除淨盡一摺上

年十月間襄樊土匪由新野攻陷鄧州經英桂飭令總兵慶德邱聯恩及候補道周煦徵等督帶兵勇前往勦辦十一月初七日官軍進至鄧境之七里河遇馬步賊匪前來衝突我軍開放大礮斃賊百餘人邱聯恩等令團勇分兩翼兜鈔賊匪退竄立將士城克復初八日五鼓邱聯恩等親督兵勇從城東北兩面槍礮環攻圓勇呐喊接應賊見官兵勢盛卽開西南門潰圍而出邱聯恩等分路追勦斃賊六百餘名生擒匪首程四等四名賊目李得名等十七名當將州城收復本年二月間楚北均房餘匪由南漳竄陷內鄉縣城邱聯恩自半扎店星馳援勦署南陽府知府何懷珍及鄧州紳士高振宛等各帶兵勇鄉團間道趕至內鄉直抵城外斃賊數十人匪眾敗退復趕殺七八百名槍斃騎馬黃衣賊目一名奪獲羸馬二百餘匹槍礮刀矛不計其數立將縣城收復其嵩縣盧

氏一帶匪徒均經該地方官及副將閻不敏等會督兵勇兜擊悉數殲除見在南陽府屬一律肅清西路民情亦俱靜謐均屬著有微勞所有在事員弁紳士兵勇著英桂擇其尤爲出力者酌量保奏毋許冒濫○奕山景淳等奏俄羅斯國人自至黑龍江岸船隻紛紛往還人數多至千餘且欲令江左屯戶移居江右其爲圖占地方已可概見奏入諭理藩院行知俄國薩納特衙門查辦○于江西陣亡知縣劉拔元等河南陣亡主簿彭希良等安徽被戕知縣朱鳳鳴等祭葬世職○庚寅諭內閣端華等奏會審被參大員請將解任各官先行革訊一摺前因聯順於奉旨飭交家人延不交出當降旨將該員解任並將侵用官項之經管筆帖式蘭森等一併解任交端華僧格林沁會同刑部審訊茲旣訊據慶陽供稱各員得受錢文並每月分給姚大各情均經向聯順告知聯順呈

遞親供並不據實登覆一切謬爲不知顯有掩飾情弊聯順著先行革職筆帖式蘭森廉保恩錦恩霈均據供認得受錢文著一併革職交端華等嚴行審訊聯順家人姚大卽海壽著步軍統領衙門順天府五城直隸總督一體嚴密查拏務獲歸案審辦○諭前因朕順被參案內究出步軍統領衙門筆帖式廉保有侵用官項情弊當將該員家產查封惟廉保係勝保之弟見尙同居所封家產有勝保貲財在內雖將來定案時自必分別給還第念勝保見在帶兵勦匪宣力行間尙有老母在家查封後未免失所此案一時未能訊結著端華僧格林沁會同刑部於查封廉保家產內先將勝保一分查明給還俾伊母得資養贍用示朕眷念勤勞恩施格外之意○諭軍機大臣等何桂清奏遵籌各路軍務等語何桂清自抵江南卽行力籌軍餉並能與和春張國樑遇事和衷將軍

務情形隨時參酌朕方望其相與有成斷不責其越俎前此咨調
下游師船係爲速克鎮江起見朕已諭令德興阿等督飭水軍與
南岸同時並舉矣南北兩岸均係該督統轄地方無分畛域嗣後
仍遇事咨商速埽妖氛以副盼望所奏金陵向石逆求援不應洪
逆日夜不安將有潛竄之意惟蕪湖等處賊蹤飄忽恐將來不犯
江西卽擾皖南自應通籌形勢先事圖維見在江南大營尙無可
分之兵著俟鎮江得手後卽與和春等商酌分兵前往蕪湖繁昌
聯絡水師以清上游江西賊勢旣分然後直擣金陵使悍賊不至
併歸池太以消後患將此由五百里諭令知之○諭桑春榮奏省
城被困情形一摺見在新任總督吳振棫已有旨催令將所統川
兵二千名餉銀五萬兩星速帶赴滇省矣回民旣揚言止欲報讐
不敢謀逆雖其言未足深信正可乘機曉諭暫戢兇鋒著該撫一

而激勵官紳嚴密防禦一面廣爲出示曉諭回民告以爾等旣稱
不敢謀逆卽不應阻遏糧道攔截要隘至欲尋漢民報讐亦當官
爲覈辦何得糾眾肆行焚殺見在新任總督統領四川官兵前來
赴任並欽派前任巡撫張亮基前來定能持平辦理無論是漢是
回良者必當安撫莠者悉予勦除若仍前兇橫則大兵一到不免
王石俱焚如此懾以先聲安其反側當可暫紓目前之急以待吳
振棫前來督辦至漢民旣遭回民焚掠自應協力同讐若復人懷
一心無怪回強漢弱著傳諭在城紳士不得各存意見務將城內
漢民認眞曉諭使自相聯絡以爲守禦之計將此由六百里諭令
知之○諭本日據桑春榮奏回匪竄擾省垣分踞城外各要路阻
遏餉道攔截外援見在督同司道將弁及在省紳士添募壯丁登
陴守禦惟需餉甚鉅庫款及地方捐銀僅敷兩月之用請飭催陝

省將奉撥未解銀兩迅卽撥解以濟危急等語著曾望顏於應撥
滇省下先將銀籌撥銀五萬兩派委委員探明路徑星速解往接
濟將此由五百里諭令知之○諭本日據桑春榮奏回匪分踞距
省數里各要路關廟村寨俱被焚掠團練陸續奔潰城內餉絀兵
單一無可恃雖據回匪揚言止欲報讐不敢爲逆而阻遏糧道攔
截外援省垣空虛竟成坐困之勢吳振棫計已接奉諭旨所有諭
調之四川官兵二千名著迅速挑撥親自督帶啟程其餉銀五萬
兩並著迅速委解以資接濟前因張亮基曾經辦理漢回互鬪之
案已賞給五品頂帶令前往雲南幫同辦理勦匪事宜又因徐之
鎗於回苗匪徒情形尙爲熟悉調任雲南臬司俾吳振棫得收指
臂之助見在回匪尙不敢公然自居叛逆該督到滇後持平酌辦
方合機宜演民痛憤回民其勢豈能盡殺回匪自稱不叛豈應擅

自興兵務須號令嚴明恩威並用自能解散黨與帖服人心以副委任將此由六百里諭令知之○壬辰諭內閣 關聖帝君福佑我朝威靈顯著前已升入中祀備極褒崇茲朕親書萬世人極扁額著造辦處成造一分恭懸京師地安門外 關帝廟所有各直省府州縣 關帝廟著御書處摹勒頒發一體懸挂其墨筆著俟摹勒完時由軍機處發交山西巡撫委員齎送解州 關帝廟收藏以昭誠敬○癸巳諭內閣御史陸秉樞奏請嚴禁告近人員捏報親老一摺據稱近來部選及分發人員往往並無老親捏稱繼母或生母年高呈請改近請飭部曉諭予以限期檢舉更正免其議處等語定例親老人員准改近省原屬錫類推恩之意若如所奏捏稱規避出乎情理之外如果實有其人必當從嚴懲辦何得准其檢舉卽邀免議該御史既有見聞卽著指名參奏不得徒託

空言致該部無從查辦○諭軍機大臣等寄諭吉林將軍景淳等
昨據直隸藩司錢忻和等奏俄夷使臣普提雅廷駛至天津海口
堅欲投文不得已而接收代遞理藩院據該衙門譯出該使臣咨
文內有接壤地方尙有未定界址欲會商定議一節中國與俄羅
斯地界自康熙年間議定以格爾畢齊河興安嶺爲界成約具在
原無可議咸豐三年該國欲會查界碑五年秋間吉林黑龍江庫
倫三處委員與該國木哩斐岳幅會查因該國不遵舊制未能辦
結據奕格等奏稱惟烏特河一處從前爲兩國公中之地未曾分
界此時普提雅廷來津投文仍以分界爲詞已令理藩院行文咨
覆特派大臣會同將烏特河一處勘辦分定界址該國接到咨文
自必駛赴黑龍江邊界著派奕山親往會晤告以從前委員會議
因該國派員議論未能公允是以日久未定今伊旣係該國大臣

正可秉公查辦以清界限如別有要求並著正言拒絕將此由五百里各密諭知之○甲午諭內閣昨因御史陸秉樞奏請嚴禁告近人員捏報親老一摺降旨令該御史指名參奏茲據覆奏仍未實指其人豈能據臆度之詞飭部紛紛查辦惟此等情弊亦難保其必無應如何立法稽查之處著該部覈議具奏○官文胡林翼奏逆匪糾集大股於廣濟內湖童司牌一帶踞險築壘伺我黃梅各軍之隙六月二十四日都興阿飭孔廣順等各營移紮武穴龍坪等處以資守禦卽以十里鋪億生寺各營爲前敵又商令楊載福派都司胡友亮管帶三板船繞入內湖二十五日黃梅北山及大河鋪迤南一帶賊匪全數擁出直撲十里鋪各營翼長多隆阿揮隊迎擊獲勝副將鮑超復乘勝攻毀賊壘一座殺賊三百餘名二十六日賊又分路擁出漫山徧野多隆阿大張疑兵於十里鋪

之北自率勁騎同鮑超潛攻億生寺西路賊壘賊知我軍注意於北而不意西路之猝至也羣賊駭奔我軍拔椿越濠焚毀賊壘三座同時十里鋪賊亦被我軍衝突奔逃兩路計斃賊千餘名是日內湖水師亦分撥三板挾勦轟燒賊船百餘隻奪獲二十餘隻又駛至童司牌小河轟擊賊壘而相距童司牌數十里之官橋亦有賊划槳成橋渡復經官兵截勦毀其船渡而還連日都興阿復密商李續賓親率隊伍由南岸渡至北岸羅昌驛與都興阿軍會合進剿該逆於河中搭浮橋三座賊壘絲亘如常山之蛇壘前長港環繞當卽派定隊伍分攻各壘並豫備柴草填港造橋都興阿以馬隊分路接應二十九日卯刻李續賓齊隊前進搭橋甫成該逆卽出眾抗拒我軍嚴陣以待俟賊逼近以劈山礮轟之賊勢稍挫我軍踰濠齊拋火器賊壘同時火起共斃賊約四百名水師復於

橋東橫擊燒毀賊划百數十號該逆擁擠落水並被我兵追殺及投湖淹斃者計千數百名童司牌兩岸賊壘十三座悉數毀平臣
胡林翼率同唐訓方進紮黃岡之傅家嶺分撥翼長巴揚阿馬步
防守馬鞍山要隘舒保馬隊各路接應七月初一日偵知孫家背
股匪會合上巴河匪黨乘我營壘初定分路偷撲我軍繞出賊後
擊其不備賊眾潰竄參將何紹彩等復率各營齊力追擊沿途斃
賊百餘名擒斬長髮老賊六十餘名奪獲旗械多件查斬廣逆畿
正張經都興阿李續賓將逆巢悉數毀除分軍駐守實屬調度合
宜不特黃梅各軍氣勢益固卽武穴龍坪運糧要道亦臻安堵戰
守皆有可恃見由瑞州調撥李續宜一軍繞道行抵黃州臣胡林
翼卽當面商機宜乘此聲威將斬黃逆氛節節埽蕩以便專力攻
取九江又奏貴州安義鎮總兵王國才由黃梅城外移營進紮灌

正督兵啟程卽有賊來偷撲王國才督隊開隊斃賊多名賊拋擲火器適中我軍火藥王國才被火轟傷登時陣亡查王國才在楚數年臨敵身先士卒大小數百戰所向有功乃因移營禦敵陣亡不勝悼惜應額懇天恩俯准賞加王國才提督銜飭部照提督陣亡例從優議卹並於陣亡及原籍地方建立專祠以慰忠魂其同時被傷身故之委員吳炳吳灼張兆麟三員並請一併議卹上諭此次勦除賊壘疊獲大勝辦理尙爲得手著官文等乘此聲威迅埽逆氛毋畱餘孽○以有鳳兼署四川總督由成都將軍署○予湖北陣亡總兵官王國才祭葬世職如提督例廣濟地方及原籍建祠訓導吳炳等祭葬世職○乙未諭內閣禮部奏遵議劉猛將軍可否請加封號一摺劉猛將軍爲驅蝗正神廟祀有年尙無封號著該衙門謹擬具奏尋奏加保康○丙申諭內閣前因御史尹

耕雲奏河南軍營文員保舉過濫當降旨將洪貞謙張席珍薛成榮三員撤銷前保之案交該部另行覈獎茲據英桂勝保奏洪貞謙等實係帶隊督戰不僅辦理文案並請將出力文員仍准從優保奏等語除洪貞謙等三員業經飭部另行覈給獎敘毋庸置議外嗣後各路隨營文員如係專辦糧臺文案並無別項勞績者著仍遵前旨辦理其有親歷行陣躬冒矢石者原准從優請獎著各路統兵大臣於保奏時將該員實在勞績詳細聲敘候朕施恩以示區別○諭前因御史尹耕雲奏軍營文員保舉太濫請將從前保奏遇缺簡放及指省補用各項文員概俟該省事竣送部引見分別敍用業經降旨准行茲據英桂等奏稱軍營文員一時未能遽離差委必待事竣引見後方能序補未免向隅請援在營候選之例准其開單請簡並在營候補等語應如何分別辦理之處著

該部妥議具奏○諭軍機大臣等英桂奏許禹匪徒蔓延日久請親往督勦等語禹州等處匪徒竄入山徑日事裏脅意圖西擾既據奏稱臬司周士鋗帶兵無多龍澤厚係隔省大員不相統屬誠恐事權不一亦屬實在情形著英桂卽分兵前赴禹密一帶督勦迅將此股匪徒殲除淨盡所有三省勦匪事宜暫交勝保督辦並著袁甲三督帶兵勇前赴潁州擇要駐紮以爲勝保後路聲援其蒙亳等處零匪卽責成史榮椿實力搜捕毋稍鬆懈至正陽關賊勢已孤正宜乘此得手之際亟圖聚而殲旃諒勝保必能策勦軍心指日將關隘攻克英桂俟豫境西路肅清卽移得勝之師與勝保會合可無顧此失彼之虞將此由六百里諭英桂勝保袁甲三並傳諭史榮椿知之○諭前據御史張雲望奏宇字官號積弊叢生於京外順義縣楊各莊各開一萬興盛字號句申通氣於四鄉

囤積糧食謂之包圈每圈以千石計並傳聞該商於近京之東安等處各有店鋪攬買雜糧三十萬之多當交文彩嚴密訪查茲據覆奏東安縣並無囤積糧石之處惟在采育鎮查有山東人李姓本鎮人朱洪陞俱係字謙官號夥計於本年五六月間在該鎮等處採買麥子約七八千石寄存該鎮廣泰堆房等處順義縣楊各莊並無萬興盛字號查得後街萬興成布鋪兼糧店掌櫃人趙姓李姓郭姓與孫蓮並字升錢鋪掌櫃人韓得祿同夥於本年麥秋時買得麥八百餘石在萬興成囤積惟見存麥僅賸二百餘石又查得楊各莊前街於本年三月間新開萬隆成錢鋪係字升錢鋪掌櫃人所開各等語著張祥河黃宗漢按照文彩覆奏各節派員詳細嚴密訪查其采育鎮等處所存麥石雜糧是否囤積居奇著先行密為查封其東安縣究竟有無囤積糧石之處何以該御史

奏稱有雜糧三十萬石之多並著覆加訪查毋有不實不盡將此諭令知之○兩江總督何桂清奏爲政貴率舊章而杜流弊勿輕信浮言得旨朕旣畀卿重任豈能爲浮議所惑無須過慮也○予安徽陣亡協領富隆阿祭葬世職○壬寅諭內閣前因五城御史保恆等奏請疏通大錢一摺當交戶部覈議具奏茲據該部酌覈覆奏戶工兩局鼓鑄當十銅錢與鐵錢局所鑄鐵制錢分成搭放民間展轉流通並無窒礙乃近日商賈挑斥大錢竟敢私造名目任意刁難以致貧民持錢入市行使維艱殊於錢法大有關繫本年五月間經戶部奏定章程於兵餉應領二成見錢全行改放制錢每月輪折梗米旗分又搭放制錢五成各官號開放錢票均按八成當十銅錢二成鐵制錢開放覈計制錢散布民間當可足資周轉總因奸商販運出京希圖射利以致市肆尙少制錢流通而

各鋪戶於銅大錢多方挑斥亦必有奸商從中煽惑以爲重票輕
錢地步國寶流通原以便民利用豈容宵小把持致妨兵民生計
著步軍統領五城出示曉諭酌定限期所有民間錢鋪及買賣鋪
戶均各遵照官號搭用制錢二成之例一律配搭行用儻於所定
限期之外有不按成行用者卽著隨時查辦如有將鐵制錢囤積
或販運出京及將銅大錢任意挑斥者卽著各該衙門嚴拏懲辦
以儆刁風而便民用○諭前因御史曹登庸奏參河南學政俞樾
出題割裂及坐索棚規各款降旨革職交英桂督同藩司瑛棨秉
公查辦茲據俞樾奏稱考試題目間有截搭並未割裂太甚等語
該學政所出覆試文題是否割裂荒謬文義難通俱有試卷可憑
無煩曉曉置辯仍著英桂督同瑛棨調查卷冊據實具奏俞樾業
經革職著聽候查辦○癸卯諭內閣英桂勝保奏水陸疊獲勝仗

克復霍邱縣城一摺捻匪踞守正陽關恃霍邱逆眾時來援應本月初十日勝保派勇目陳萬金等帶領團勇並划船礮船駛至城西湖南岸與大股逆匪相值將賊船二百餘隻攔截槍礮齊施斃賊數十人落水死者無算追至霍邱西門整隊攻擊有投誠之捻匪張金桂出城接應陳萬金等卽用爲嚮導趁勢擁入復斃賊三四百人搜殺餘匪追剿二十餘里殲賊殆盡立將霍邱縣城克復其前路賊船百餘隻駛至新河口經千總敖天印等帶礮船轟斃賊二百餘人奪獲賊船三十餘隻此次克復霍邱縣城水陸均獲大勝勦捻尙爲得手仍著英桂等激勵將弁迅將正陽關攻克勦除餘匪母稍遲延○諭候補三品京堂張芾專辦徽池防剿三載以來頗資得力前在徽州軍營聞丁母憂呈請回籍營葬當經諭令何桂清俟接替有人卽行傳諭張芾給假六箇月回籍葬親茲

後據何桂清晏端書據情代奏並張芾自行具摺請回籍營葬後
懇恩終制等語見在徽州防務仍當喫緊張芾熟悉情形仍著暫
畱防勦俟軍務稍平卽遵前旨給假六箇月回籍營葬○諭英桂
勝保奏遵保攻克方家集三河尖等處出力員弁兵勇併案請獎
開單呈覽一摺揀首以方家集爲門戶三河尖爲老巢前經英桂
等督率員弁等疊次攻勦獲勝平毀賊巢十餘處殲斃數萬餘人
皖豫交界漸就肅清在事出力各員著有微勞自應量予恩施以
昭激勸至所保在營文職至五十餘名之多已不免冒濫况前經
吏部奏准糧臺文案各員不准越級保升及免補本班此次單內
仍有越次及免補本班人員雖據稱不分文武一概親冒矢石殊
難憑信著英桂等確實覈減另行具奏○予河南陣亡知縣王萬
齡等祭葬世職○甲辰官文胡林翼奏七月初一日都興阿派翼

長多隆阿督帶馬隊副將鮑超督率步隊分五路進攻黃蠟山等處賊巢又分兩翼以截王家河十里鋪兩路之賊石清吉帶兵勇接應姜玉順帶隊截賊後路賊見我軍遽至亦分股齊出抗拒屢戰數時之久多隆阿偵知該匪以老弱守壘而伏悍賊於村落以截我軍遂商令鮑超分兵繞攻其後多隆阿派馬隊直衝村落伏賊盡起勢甚兇悍多隆阿揮隊直進殲其悍賊數十名賊始敗竄鮑超卽率勇分攻賊壘施放噴筒賊營四面火起羣賊狂奔我軍連夜追剿直至初二日收隊計踏毀黃蠟山甘家畈等處賊壘四十八座共斬賊五千餘名淹斃者不計其數生擒長髮老賊數百名水師楊載福前派都司宋美富帶領礮船扼守蘄州江面先於六月二十六日拆毀普提壩逆匪浮橋七月初九日復督勇接剿斬殺百餘生擒長髮七名奪獲洋礮旗幟刀矛無算臣胡林翼以

孫家觜流水灣踞賊爲黃岡蘄水之衝亟應設計剿除十一日令
李續宜率湘寶信五營進攻以舒保馬隊繼之又派遊擊孫昌凱
都司左光培帶水師會剿並令唐訓方等埋伏鳳凰山等處以防
援賊十二日李續宜等督隊前進抵灞崎山見賊搭有浮橋兩道
與蘄水之賊往來相通李續宜分兵立於灞崎山嶺以防蘄水之
賊截我後路又派從九李耀南等分路進攻而自督千總蕭啟掌
等率兵隨舒保馬隊由中路進列陣甫定該逆率眾三四千人分
路抗拒相持數時我軍一鼓而前馬隊縱橫衝擊斃其騎馬悍賊
十餘名餘賊大亂乘勝追剿焚毀賊壘六座其蘄水援賊千餘經
都司巢日昇等督兵迎剿當即敗退統計各路陣斬擊斃之賊及
投水死者約二千餘名李續宜復率湘寶等營馳往流水灣攻剿
賊壘該逆知孫家觜賊已大敗匿而不岀適三台河防兵鄒漢章

等隊伍及孫昌凱礮船續至水陸夾攻斃賊無數越牆之賊四五百人經伏兵全數殲戮其往援孫家觜之賊約三千餘人經唐訓
方率余雲龍等奮力擊斃斃賊甚多追殺十餘里而還孫家觜等
處業已肅清查黃梅馬步各軍前次童司牌之戰及見在黃嶺山
等處大獲全勝前後斬馘以萬計雖係都興阿李續宣調度得宜
亦由該將領奮勇圖功其鮑超一員連日血戰率同親兵累屍登
壘身殼受傷仍不少卻尤爲忠勇罕匹相應仰懇天恩優加獎
勵俾知感奮此外出力員弁兵勇懇請查明保獎上諭內閣此
次黃梅官軍以少擊眾連獲大捷在事將弁兵勇均屬奮勇副將
銜補用參將鮑超連日血戰尤爲出力著以副將儘先選補並賞
加總兵銜以示鼓勵其餘出力員弁兵勇仍著官文等酌量保奏
候朕施恩○江西巡撫耆齡奏賊匪屯聚甯都州屬鈞峯地方約

四五萬人聞五月二十六日王鑫率勇追至釣峯由中路進力斬
悍賊數十人賊乃敗走左路山上一股經王開化設伏敗之焚其
巢穴追斬二三百人沿河之賊望風奔潰其右路山上賊巢亦經
王文瑞攻破逆匪奔竄王鑫令各營搭橋過河追剿陣斬僞將軍
毛幅富餘匪敗逃約共斃賊二千六七百人時永豐敗匪思竄吉
安王鑫率兵回剿二十九日行抵小源地方探聞賊眾數千屯集
古夏地方將撲甯都王鑫卽於六月初一日進剿令張運蘭等率
勇分伏兩邊山後約聞鼓聲而出自率小隊至河邊誘戰悍賊五
六千過河來撲王鑫退至山坡俟賊逼近鳴鼓回兵兩旁伏兵齊
起該逆卽退張運蘭已衝過對岸前後夾擊斃賊甚多追至謝坊
村內另股千餘出拒又被我軍擊斃二百餘人共計斃賊一千三
四百人初三日又敗賊於東山壩殲斃三千餘人旋探僞老國宗

楊宜青等麤聚廣昌詐稱十二萬人欲由甯都永豐趨救吉安分
擾贛州湖南王鑫以此股逆匪不除有礙江楚大局遂激勵士卒
整頓鄉團剋期進剿並飭朱惟堂等率兵先往樂安勦辦以杜永
豐敗匪竄擾十六日王鑫率湘勇由大路進都司張騰霄知縣孫
效曾各率團勇從左路進十七日黎明抗拒廣昌城五里之三官
殿悍賊萬餘分五路而來我軍亦分五路應之王鑫親身率勇奮
力直衝五路之勇乘勢齊進賊大敗奔竇我軍奮追至長生橋地
方忽僞七國宗楊輔青帶賊數萬前來接應敗賊亦復回鬪王鑫
揮勇奮擊張騰霄匹馬陷陣賊又大敗追至南豐縣界而還斃賊
約三千餘人生擒一百十三名拔出難民二千餘人該逆屢敗之
後心膽皆寒南豐宜黃之賊均已遁去于總朱惟堂等亦於十九
日收復樂安縣城正擬進攻撫建據報吉安各營失利隨連夜馳

回永豐因新淦賊匪日多與吉安之賊聯爲一氣擬先攻新淦次及吉水吉安等情前來查該道王鑫追勦甯都州敗匪復值大股賊匪圖犯吉安頻摧大敵殲賊不下萬人拔出難民一萬數千人戰功之偉實所罕覩見因吉郡各營失利不得不折回策應惟新淦之賊日聚日眾旣已上通吉安復思旁援臨瑞必須先行勦除方免受其牽掣 上諭記名道王鑫追勦江西甯都州敗匪適值僞國宗楊逆率黨二三萬人由新城往援吉安並僞國宗楊宜青等與石逆撥來賊黨詐稱十二萬人欲由甯都永豐趨救吉安分擾贛州湖南均經該道激勵士卒整頓鄉團先後擊敗殲賊不下萬人拔出難民一萬數千人其所派往甯都勦賊之朱惟堂等亦於六月十九日收復樂安縣城此次王鑫勦辦各股匪徒斬馘盈萬大挫兇鋒著卽乘此聲威由新淦進攻吉安以期迅克堅城○

者齡奏據吳坤修等稟報閏五月十一日瑞州賊匪始以數百人出犯北岸旋由金川門出三股撲南岸湘寶各營分投迎擊該逆卽遁入城二十五二十六二十七等日該逆屢次出撲均被我軍擊退六月十九日初更時分風雨交作賊復傾巢而出分作數股丁俊等兩面橫截寶前營從旁夾擊該逆一股仍退回城一股三四千人繞過斷水橋望西北狂奔普承堯恐逆眾遠竄擾及他處立派都司章奪錦等不分晝夜先後跟追劉騰鴻派劉騰鶴等率勇邀截吳坤修亦派兵往駐分宜以扼袁郡該逆始竄奉新新昌邊界知防守嚴密不敢入境折向西南分爲兩股頭起七八百人於二十三日竄至峽江縣屬之仁和墟經劉長佑派令鄭金華等併力迎戰康國器等率領戰船沿河夾擊斬賊數百名生擒二名該逆竊拆民房門板渡河水師開礮轟擊溺斃甚眾殘匪二百餘

人自墟後衝出翟國彥等督勇追至烏口殲戮無算一起約三千人二十一日竄至上高縣泗溪地方因大雨水漲未能渡越章奪錦追至殺賊多名該逆沿河敗逃二十二日竄至上高經蕭啟江等率勇堵禦上高縣知縣孫文鏞會營督率兵勇往助旋經黃秉珍等追至將馬隊分爲兩路奮勇鈔擊該逆大股四散奔竄上高縣城本多坍塌該逆卽竄入城黃秉珍等分門追入竭力巷戰殺賊四百餘人馬隊把總賀榮陞立斬僞監軍梁逆復擒首逆僞總制嚴守和一名敗匪由南門逃竄逆首僞檢點賴豫先被火彈燒傷情急棄馬投水餘匪奪船而渡約近千人共計溺斃殲戮之賊將及二千人渡河之賊又經段起樊俊率勇追殺數十人逃散之賊僅三四百人望吉安而去瑞郡各營以城賊既經分竄急應乘時攻拔遂於二十及二十八九等日各率存營弁勇晝夜攻擊劉

騰鴻將大礮移近賊匪礮臺將石橋頭層礮臺轟塌燒斃賊二百
餘人並將礮臺空倒普承堯率勇平濠毀椿直逼城下賊矢石如
雨仍不稍退吳坤修亦移大礮對城轟擊竟夜並率勇拔籤踰濠
屢次薄城駕梯欲上均被礮石擊回遊擊劉國斌率水師戰船協
攻東門殲賊不少奪獲賊船四號查瑞州之賊被圍經年困極思
竄幸普承堯派隊追剿各營跟蹤前進節節截殺殲擒殆盡並斬
首逆嚴守和等多名使羣兇不至倖逃法網洵足以伸國法而快
人心在事尤爲出力之縣丞黃秉珍等擬先請給予獎敘其防範
不密之都司劉光明千總李華榮請一併革職畱營差遣查長濠
係廣東南韶連道吳坤修分管咎亦難辭請拔去花翎巡檢沈慶
安把總黃雲力戰陣亡請飭部從優議卹 上諭此股竄匪經官
軍節節截勦不至倖逃法網所有尤爲出力之縣丞黃秉珍著以

知縣遇缺卽補並賞加同知銜都司章奪錦著以遊擊儘先選用
並賞換花翎國子監典簿陳徵言著以通判不論雙單月遇缺卽
選儘先把總賀榮陞著以守備遇缺卽補陳徵言賀榮陞並著賞
戴藍翎縣丞劉嶽昭著以知縣儘先選用從九品劉德謙著以府
經歷縣丞遇缺卽選其防範不密致城賊他竄之都司劉光明干
總李華榮均著革職仍畱營差遣以觀後效廣東南韶連道吳坤
修著拔去花翎仍著耆齡督飭在營將弁實力進攻速將瑞州城
池收復陣亡之巡檢沈慶安把總黃雲均著從優議卹○耆齡奏
閏五月二十一至六月初六等日吉安府城賊匪或出千餘人或
數百人修壘撲營均經官軍擊退初十日周鳳山進紫螺岡東北
兩門出賊四千餘拌死來爭周鳳山派隊迎擊趙煥聯劉培元各
督所部鏖戰斃賊數百人賊退十一日城賊七千餘囂擁來撲周

鳳山一面督勇開濠一面分隊接戰殲賊四百餘人十二至十六等日連日接戰均有斬擒十七日大股賊匪突出西門文翼督率水陸各勇迎擊趙煥聯劉培元周鳳山各派勇夾攻賊敗回巢是日午刻出賊萬餘包出鳳字營後周鳳山派撥各營分五路迎敵槍礮齊施奮力衝突斃賊百餘人該逆抵死不退各勇戰久力疲寡不敵眾又以口糧積欠軍心不固紛紛敗潰賊匪撲入營盤放火焚毀該逆乘勢往撲和長兩營趙煥聯劉培元撤隊回救馳至營前營內業已火起亦卽相繼被陷賊又撲吉字營文翼督同弁勇竭力固守相持至晚賊始退去趙煥聯劉培元營壘既失退紮固江文翼因孤軍無援恐爲賊乘亦卽拔營繼退該處糧米全無士卒終夜未能得食各營會議退紮安福見在和長兩營暫駐安福城內吉字營紮城外以資堵勦查吉安八縣一廳均已克復所

未下者僅一府城今鳳字等營被匪撲陷賊勢轉張探聞該逆已
擾及吉水之阜田地方難保不四處延蔓臣飛飭贛南鎮道選派
兵勇三千名星馳赴吉會合吉和長三營再籌進攻並令黃冕等
速調龍泉楚贛兩軍移禁泰和遏賊上竄之路此次鳳字營雖首
先失利究因連日苦戰兵力疲乏加以欠餉過久人無固心致有
此失知府趙煥聯參將劉培元營壘被踏皆因往救鳳字營所致
與守禦不力者不同且前此克復永甯吉水等縣並圍攻郡城曾
經百戰屢著勞績功堪抵過可否與前任廣東羅定協副將周鳳
山均免置議出自遞格鴻慈吉安府知府黃冕籌辦吉安各營軍
餉是其專責乃欠餉日久戰士飢疲以致吉郡之師功敗垂成實
難辭咎應請旨將吉安府知府黃冕摘去頂帶革職畱任仍責令
趕籌餉需軍械以贖前愆都司張開輯被燒殞命陳光孚中礮陣

亡請照遊擊陣亡例從優議卹外委周九皋李芳園請交部議卹上諭此次各營官兵失利實因連日苦戰師疲軍餉不繼所有帶兵之知府趙煥聯參將劉培元副將周鳳山均著免其置議吉安府知府黃冕籌辦軍餉是其專責乃因欠發日久以致戰士飢疲實難辭咎著摘去頂帶革職畱任責令趕籌餉需軍械儻再不知愧奮卽行嚴參治罪都司張開輯被燒殞命陳光孚中礮陣亡深堪憫惻均著照遊擊陣亡例從優議卹外委周九皋李芳園均著交部議卹○諭軍機大臣等本日據福興奏江西軍情喫重本省兵力不敷請由江南大營調撥廣勇一千五百名又遊擊興貴等營帶兩起陝甘兵一千餘名西安二起馬隊四百名共計兵勇三千名前往江西助勦並請將原帶廣勇之戴文英馮子材張永清梁成桂原帶陝甘兵之興貴等一併派委營帶馳往各等語見

在江南官兵環攻鎮江軍情正當喫緊其勢恐難多調見已諭令
葉名琛由廣東撥兵二千名派總兵壽山統帶馳往福興軍營助
剿惟江西省東路兵力尙單福興原帶之兵止有千名著和春卽
將福興指調之將弁兵勇能否派撥若干之處酌量情形迅速調
撥一面具奏一面先行知會福興可也將此由六百里各諭令知
之○諭福濟等奏餉需置乏請飭江浙等省按月籌解一摺安徽
軍營餉需業經何桂清等遵旨陸續撥解惟據福濟等奏稱見在
六安賊援愈集李孟羣一軍阻於流波礮麻埠地方亟應厚集兵
力會同攻剿而餉項短絀飢軍難振請飭江南省於按月二萬兩
外添撥銀二萬兩浙江山西陝西按月各撥解銀二萬兩等語著
何桂清於按月二萬兩外再添撥銀二萬兩湊成四萬按月如數
解往山西陝西兩省月解皖餉著恆福會望顏按照每月二萬兩

之數務各如期起解勿稍留滯至浙江省於接濟各路餉需之外
恐未能再行按月籌銀解廬惟該處待餉甚迫仍著晏端書竭力
籌撥以資接濟將此由六百里各諭令知之○諭本年正月間曾
諭令葉名琛酌調精兵一二千名交參將衛佐邦管帶間道馳赴
福興軍營助剿並籌餉接濟迄今未據覆奏本日據福興奏所帶
兵勇數止一千請由江南大營添調並稱潮州鎮總兵壽山所帶
潮州官兵因南贛無事已於六月間回粵該將軍所請粵兵查無
音信等語此時江南官兵正當圍攻鎮江喫緊一時未必卽能分
撥南贛一路業已平靜壽山一軍卽可馳赴廣信聽候福興調遣
著葉名琛速飭該總兵卽行管帶精兵二千名剋日前往以資攻
剿母稍遲延至該省夷務日久未見奏報甚深懸繫前據葉名琛
奏新來夷酋往散打連地方尋咷咷商議尙未到粵見在又逾兩

月究竟是否前來此事必須速爲了結固不可稍涉遷就草率從事而日久相持迄無成議設或別生枝節辦理又形棘手廣東民情物力固不難與之久抗儻如從前故事任意駛赴上海天津則廣東雖能自顧而大勢總未了結且海關停市將及一年各省軍餉種種支絀該督豈不知籌及著葉名琛卽將見辦情形迅速具奏總以及早定議免致別生變故爲上策也將此由六百里諭令知之○諭法福禮奏賊匪裏脅愈多請添調烏嚕木齊官兵以備援剿一摺此次回匪滋事各城派兵進剿共計七千餘名昨據扎拉芬泰奏報伊犁兵勇行至巴爾楚克該匪聞風而遁立解城圍我軍追剿大獲勝仗見在道路廓清所謂烏嚕木齊及喀喇沙爾等處官兵亦據烏爾清阿報稱該官兵於六月十七日已由庫車啟程前進法福禮尙未知悉所請添調烏嚕木齊官兵一千五百

名如兵力已敷即可毋庸調撥仍著倭什琿布照數挑選豫備聽
調將此由五百里各諭令知之○調任雲貴總督吳振棫奏雲南
漢回互鬪必須有大兵鉅餉痛剿一二處然後可以就撫得旨卿
所慮甚是所籌亦極妥協○命江甯將軍都興阿在欽差大臣官
文軍營幫辦軍務○予湖北陣亡協領密雅明阿等祭葬世職○
乙巳諭軍機大臣等培成奏賊勢緊急催調後路官兵應援一摺
據稱和闐回匪變亂坡斯坎木洛和碉瑪三軍臺被燬經該大臣
派兵往剿於阿哈雅腰臺地方遇賊接仗賊匪退回張古牙莊忽
有帕爾曼回子從後截殺傷斃兵勇三十餘名擄去兵丁數名並
奪去擡礮鳥槍等件帕爾曼離城甚近該處回子業被勾結變亂
儻直撲和闐恐兵單難以抵禦等語賊匪擾及和闐前據業布沖
額奏稱挑派所帶官兵二百名並阿克蘇防兵三百名共五百名

交守備劉興帶領由草地進剿其阿克蘇防兵由烏嚕木齊備調
兵內挑派補還此時劉興所帶官兵當早經行抵和闐卽著培成
督飭此項官兵實力堵勦和闐僻處一隅就近實無可調之兵惟
旣據培成奏稱賊勢緊急自應續籌調撥著海樸卽將烏嚕木齊
補還派防阿克蘇兵三百名先行飭令由草地前赴和闐與劉興
一軍會合和闐得此兵力自己足敷勦辦培成務當悉心調度將
匪眾悉數殲除毋任再有延蔓昨因法福禮奏請添兵會諭令倭
什琿布挑兵一千五百名備調所有阿克蘇防兵亦關緊要並著
海樸飛咨倭什琿布卽於備調兵內抽調三百名前赴阿克蘇以
補前調防兵之數毋任遲延將此由五百里各諭令知之○諭前
據英桂奏禹密匪徒日熾請移見帶之兵親往督勦當經諭令將
三省勦匪事宜暫交勝保督辦並著袁甲三督帶兵勇前赴潁州

擇要駐紮以爲勝保後路聲援本日據勝保奏患病情形請飭袁
甲三來營權統諸軍俾得請假調理等語見在攻勦正陽正當喫
緊之際勝保旣經患病著賞假一月在營調理袁甲三著卽馳赴
正陽暫行統帶各路兵勇接辦攻勦事務勝保病痊仍著督飭各
軍迅將逆匪蕩平袁甲三卽畱於正陽關幫同辦理將此由五百
里各諭令知之○丙午諭內閣前因京城鋪戶人等於行使大錢
任意挑剔經巡防王大臣等奏定章程嚴行懲辦茲據步軍統領
衙門順天府奏稱該鋪戶人等日久玩生於當十銅錢挑剔日甚
兵民生計維艱請飭查辦等語自應申明前定章程俾知警惕嗣
後各鋪戶及各項買賣人等如有不肯行使當十銅錢被首拏獲
初犯者枷號一箇月遊示旗營地面再犯者發極邊煙瘴充軍遇
赦不赦如被告到官畏法悔過免其治罪誣告者照例反坐其銀

市交易不准將制錢大錢分定價值市肆各項貨物均不得任意
擡價及囤積不售違者從嚴究辦卽著步軍統領衙門順天府出
示明白曉諭儻兵役人等有受賄徇庇或敢於藉端滋擾者均著
從嚴懲處此項案件隨到隨辦毋得稍有積壓畱難以儆刁風而
懲玩泄○諭英隆奏勦捕匪徒淨盡地方肅清一摺直隸豐甯縣
大閣兒地方匪徒聚眾搶掠經英隆派委熱河道賽音博勒格圖
督帶員弁兵勇前往搜捕將要犯劉標等十七名登時擒獲餘匪
均經殺斃起獲贓物多件其湯河口等處竄匪亦經樂平縣知縣
景蘭等格斃一百九十餘名首犯劉幅汰先經署豐甯縣知縣穆
翰等帶兵殲斃並斃餘匪一百五十名拏獲各犯訊明就地正法
地方一律肅清辦理尙屬妥速署豐甯縣知縣穆翰大閣兒巡檢
盛祖培把總王鑑隨同勦匪功過尙足相抵應得疏防處分均著

免其查辦出力員弁著准其擇尤酌保數員毋許冒濫○諭軍機大臣等本日有人奏天津所屬之青縣靜海等處有梟匪從殿陽從登峯及著名匪目王海牛等糾匪肆搶又文安縣所屬之岳村張姓被梟匪搶劫一空獻縣西峯村郭莊西城河城等村河間九吉村武強縣之張法臺隄南村均有強劫之案更有肅甯地面鹽梟勾結土匪八九百人在元城村盤踞此外交河阜城東光大城東安完縣等處被害之居民鋪戶不可枚舉等語直隸天津河間等府梟賊充斥前據譚廷襄奏請從嚴懲辦當降旨令該督通飭各州縣董率團練加派兵役無分畛域合力兜擊如遇大夥拒捕准其格殺勿論地方官拏獲審明後先行就地正法諒已通諭遵辦此次所奏各案著譚廷襄迅派明幹員弁前赴各屬嚴密查拏務將各匪悉數撲滅毋令一名漏網原摺鈔給閱看將此諭令知

之○德興阿奏製造水礮臺情形得旨水礮臺式樣作法著繪圖
貼說附報具奏○丁未諭內閣前據已革河南學政俞樾呈遞易
原圖據稱由 欽定周易折中所載河洛未分未變方圖三角圖
內推闡而得不知康熙年間大學士李光地等奉 旨編輯周易
折中於啟蒙論內具載河洛陰陽動靜加減乘除各圖又附載此
二圖原以易理精微象數兼賅推其緒餘即可通於算學句股開
方等法非以此爲作易之原也今該員輒憑臆見行爲兩儀四象
八卦六十四卦之圖穿鑿附會轉失其眞且有訾議先儒之語尤
屬率意妄陳原圖著發還○是月緩山東臨清等十三州縣及德
州等二衛被旱被風被雹新舊正雜額賦展緩直隸磁州等十三
州縣並各旗地被旱被雹被蟲新舊額賦有差

東華續錄

咸豐七十四

臣王先謙敬編

臣陶濬宣恭校

八月己酉朔日食○諭軍機大臣等前因勝保患病賞假在營調理諭令袁甲三馳赴正陽關暫行統帶兵勇茲據袁甲三奏稱俟渦北肅清卽移營督攻韓圩兼防正陽後路等語自係尙未接到前旨見在英桂因高密一帶匪徒日熾帶兵親往督勦勝保又患病給假正陽正在攻勦喫緊之際各路兵勇必須有人統帶袁甲三著卽馳往正陽暫行接辦其渦北韓圩之賊卽著史榮椿朱連泰分路督兵攻勦並嚴防該匪回竄之路袁甲三俟分撥定妥卽赴正陽毋稍遲誤將此由六百里諭令知之○庚戌諭內閣崇綸李荫奏請飭催奉天米石迅速運通一摺奉天省額運米豆並採

買捐輸米石時近秋分尙未據報開行日期恐該船戶包攬載貨沿途逗留以致裝運稽遲更恐節候過遲船隻凍阻剝運維艱著盛京將軍奉天府尹嚴飭該運員及早兌竣開行務於八月內全數抵津並著直隸總督委員提催卽飭天津道豫調剝船一俟海船收口迅卽剝運赴通交納毋再遲緩○諭前因倭什琿布奏商民籲求免徵鹽課一摺當交戶部議奏茲據該部覈議具奏烏嚕木齊鹽課前經業布沖額奏請徵收旣據倭什琿布以近年內地貨來稀少商民無力完繳紛紛具呈求免自係實在情形所有此項鹽課著概行免徵其官交鹽課業經存庫備用來歲卽著停止並鎮標各營未經完納者毋庸催追已經完納者一併發還以示體恤至辦理鹽課之署迪化州知州英貴印房章京達春泰已革山西介休縣知縣程震佑前據業沖額保奏業經降旨分別加恩

今既辦無成效該員等前得獎敘著卽撤銷○先是御史李培祐奏請嚴定保舉限制下吏部議至是奏該御史所擬條目多與欽奉諭旨奏定章程相符仍應遵照辦理至請賞翎枝除軍營河工出力准請旨賞帶尋常勞績不准濫請翰詹人員如係軍營勞績出力仍准保奏坊職並准保奏道府其餘各項勞績止准保奏遇缺題奏至庶吉士一項應請嗣後無論何項勞績止准保奏俟散館後以應升之缺升用概不准保免其散館授職編檢以待定制從之○辛亥諭軍機大臣等慶英固慶奏官兵出隊接仗先勝後挫並請飭陝甘總督速撥銀兩以濟軍需等語此次葉爾羌官軍正與西路賊接仗業已獲勝忽有東路賊匪鈔襲其後致稍挫衄見在伊犁官兵已由巴爾楚克前赴葉爾羌慶英等正可督飭弁兵會合夾擊將該匪趕緊殲盡毋令蔓延至所請陝甘撥餉據

樂斌七月內奏撥過西路兵餉十四萬兩有葉爾羌銀三萬兩在內此時計已解到著慶英等遵照前旨迅速勦除匪眾以節餉需將此由五百里諭令知之○諭前因俄使普提雅廷咨稱欲會商未定界址當諭令奕山親往會晤秉公查辦昨據錢忻和等奏該使於七月二十六日折回天津海口該藩司等派員將理藩院回文當面付給並告伊已專派大員在黑龍江等候會辦該使既得回文又經地方官以禮貌相待歡欣而去惟稱查勘地界一事尙須折回本國請示該國主等語自係實情此次普提雅廷路過黑龍江諒必至海蘭泡等處奕山如與接見當告以中國既有咨文至薩納特衙門將來未定界址自必由該使臣與奕山秉公查勘所有海蘭泡闊吞屯精奇哩等處均有該國屬下人蓋房占住見在界址未定自應先行撤回以守舊章而敦和好卽或一時未能

全撤亦須飭令安靜居住勿與中國民人互生嫌隙該使臣係該國大臣諒能約束屬下靜候查勘儻或該使臣不到黑龍江與奕山晤面奕山亦可曉諭海蘭泡等處人告以該國有大臣普提雅廷卽日前來與該將軍查勘界址兩國永敦和好爾等若不候定界擅自蓋房居住實屬非禮中國必咨行該國懲辦如此剴切曉諭仍暗加防範先事豫謀以消後患○壬子諭內閣王懿德慶端奏官軍攻克甯化縣城福建被擾地方一律收復一摺江西逆匪竄擾福建汀州邵武各郡縣經官軍節次攻克收復城池惟甯化一縣尙爲賊踞經該督派委汀漳龍道英樸等帶兵馳抵該處守備潘繼文等督兵會合攻擊該匪登城抗拒該道激勵兵勇乘夜急攻將西北兩門竄出之賊殲擒殆盡其東門之賊鳬水過河紛竄者復被我軍截殺無數卽將甯化縣城克復此次福建省勦辦

江西竄匪三月之內將失陷城池次第克復地方一律肅清辦理
尙爲妥速所有在事尤爲出力之文武員弁紳士著該督等查明
奏請獎敘其傷亡兵勇並著查明咨部請卹○官文胡林翼奏黃
州官軍自勦除黃岡縣屬孫家觜等處賊壘後臣官文咨令各軍
乘勝攻勦偵知黃蘄連界之馬家河等處賊營碁布星羅非出奇
制勝以除之則我軍動多牽掣臣胡林翼遂率唐訓方李續宜審
察地勢分路進勦十八日臣胡林翼派仁字六營由左路進又兩
訓義寶信等五營由中路進各以馬隊輔之又派昌營及團勇排
列左路爲疑兵而以湘寶三營並信中營隨同副都統舒保馬隊
伏中路山陰相機而動寅刻我軍出隊誘戰踰時賊以三千餘人
排右路以四千餘賊排中路以七八千賊直撲我左路何紹彩率
仁字六營奮力禦之李續宜密派張文煥等分率各營而自帶湘

副中營捲旗息鼓分四枝向左路伏山而行出其不意奮擊賊腰
何紹彩等見賊將爲我軍所截與馬隊合力圍勦左路之賊大敗
中路賊急揮賊隊衝我中路並援賊左路唐訓方等奮力擊退而
右路賊亦潰臣胡林翼復督各營勇乘勝追殺直擣賊巢槍礮齊
施舒保統馬隊衝擊鏖戰三時之久連踏賊壘四座我軍右中兩
路見賊老營已破勇氣百倍馬步合力環攻連踏賊壘四十餘座
馬家河等處賊壘悉平計是日焚斃溺斃及擒斬者約四千餘人
奪獲軍械無算敗賊盡竄蘄水深山我軍追殺十餘里是日之捷
李續宣料敵決勝隨機應變實堪嘉尚而將士用命則以仁字六
營更爲出力見在上巴河以上黃岡境內一律肅清臣胡林翼見
卽提師進駐蘄水臣官文查蘄廣山深箐密皖逆踞四鄉要隘者
尙多再得數大戰以次埽蕩則全楚自臻敉定矣報聞○和春奏

據張國樑咨稱紅花山一處偏近摩旗山賊壘與虎頭山相離不遠須在此紮營方能扼要因於六月二十日傳集夫役夤夜趕築竭一夜之力工纔過半賊匪分股來撲均經我軍擊退隨催夫役將新營築就飭都司王瑞圖管帶川兵駐守又於山下添築一壘以資策應亦令川兵駐紮二十一日雨後摩旗山突出賊匪數千撲我紅花山新營張國樑親帶官軍馳往應援槍礮頻施逆屍枕藉不可勝數賊勢大敗經李若珠等橫腰截擊又斃無算惟都司王瑞圖連次親放大礮斃賊最眾該逆亦以擡礮回拒洞穿胸臆登時陣亡我軍於酉刻收隊約斃賊五六百名連日乘勝移營進逼總兵陳世忠等每聞陸路接仗卽率同遊擊葉長青等各駕師船乘風駛赴金銀二山及瓜州新河口一帶對準賊船開礮轟擊該逆堅伏不出東南兩面布置已定惟西面直通金陵沙洲夾江

逆黨與糧藥皆從此出進必須另行設法亟圖合圍臣和春卽於
七月初三日偕許乃釗親赴鎮江查看地勢非繞出高資逆壘之
西度地安營斷彼外援不足以操勝算十二日令張國樑余萬清
帶領副將王浚等由西面繞至高資我軍正在紮營逆匪大股出
撲張國樑親督官軍奮力擊勦接戰多時斃賊甚眾該逆仍復死
拒我軍槍礮並進擊倒悍賊數名始行敗退旋值大雨如注張國
樑等帶同官軍冒雨督夫露處郊野竭一日夜之力成營八座卽
派兵勇駐守仍復晝夜添築以期聲勢聯絡十三日早鮎魚套口
賊船見我軍紮營江邊駛出窺伺經水師守備賴鎮海管帶各船
由北岸揚帆起碇駛至南岸鮎魚套口施放大礮轟倒江邊逆匪
礮臺數座並擊沈賊划數隻逆匪敗退十五日黎明大霧迷漫城
南逆匪突出千餘人欲撲我軍營盤經虎嵩林余萬清先後擊退

斃賊二百餘名奪獲軍械數十件查鎮江逆匪踞守極堅我軍見

於高資逼近賊壘紮營多座直抵江邊金陵水陸外援皆已無路可通三面合圍漸成坐困之勢連日紮營迎剿先後斃賊不下一千餘名都司王瑞圖楊冠孫把總黃立紀羅得勝外委鄭得成均被礮陣亡深堪憫惻應請旨飭部從優議卹○以克復江南溧水縣城賞總兵官傅振邦提督銜部從優議卹○以克復江南溧水縣城賞總兵官傅振邦提督銜開復總兵官虎嵩林革職畱任處分○癸丑諭內閣耆齡奏賊匪竄入縣城請將失事各員分別懲辦等語七月初五初六等日撫州賊匪竄至進賢縣支嶺地方分撲官軍營盤寶勇接應遲延以致賊匪擾出我軍之後各營均被焚燒蹋毀賊匪乘勢撲入縣城知縣史昌壽馳赴池溪橋集團助勦舉人焦有森聞縣城有警立帶團勇直抵城下與賊接仗賊匪敗匿城內總兵李定太派守備

萬泰等督兵進剿副將周鳳山亦率所部前進該逆知官兵雲集
卽於十三日遁回撫郡當將縣城收復所有管帶寶勇接應遲延
之已革武岡州吏目吳學堅著卽拏問交耆齡訊明定擬具奏幫
帶寶勇藍翎卽選府經歷縣丞鄧國祥著卽革職進賢縣知縣史
昌壽於縣城被匪撲入雖邀集鄉團與官兵會剿旋卽收復惟城
池究已被擾咎無可辭著卽革職畱於地方辦理善後事宜以觀
後效管帶志同軍等營補用同知鍾世楨等著將前次堵剿出力
准保之案撤銷以示懲儆○江西巡撫耆齡奏據廣東南韶連道
吳坤修等稟報七月初五日各營進攻瑞州府城吳坤修率彪勇
攻北門普承堯率寶勇攻西門劉騰鴻同劉連捷等率湘勇渡過
北岸攻東門直抵城下各用雲梯奮力仰擊施放火箭噴筒城上
槍礮木石密如雨下我軍奮不顧身前者受傷後者繼進劉騰鴻

親執桴鼓督陣藍翎把總谷文勝被傷陣亡攻至午刻士卒受傷甚多恐損精銳始各收隊初六日以後各營不時進攻十一日夜復大舉攻城普承堯等分率兵勇齊逼城根十二日劉騰鴻移千斤大礮將橋南賊築礮臺攻破拋擲火彈燒斃臺內逆匪無算劉騰鴻身受槍傷仍裹創督戰十三日又攻破橋北礮臺劉騰鴻督隊過橋驟中南門賊礮登時陣亡其弟騰鶴騰鵠仍率勇冒險爭先奮攻愈急普承堯令蕭鋗趕往南城幫同攻勦時城內逆渠僞將軍黃洸亦爲我礮所斃賊眾畏懼乞降吳坤修普承堯均佯許之以懈賊守是夜我軍拋擲火彈焚賊城上更棚逆眾大亂普承堯卽督率各營緣梯登城分途勦洗殺賊不計其數賊眾縋城逃走吳坤修之彪勇劉國斌之戰船伏兵齊起悉數殲除其情急投河者均爲水師擒斬無一走脫共計殺斃溺斃者二千數百人各

營生擒數百名分別訊明處斬難民開釋奪獲大礮一百餘尊旗械不計其數當卽克復郡城臣查瑞州府城自咸豐五年冬間被石達開攻陷踞爲巢穴未能猝下今拔此堅城蕩滌羣逆首夥悉就誅戮洵足伸天討而振軍威通計圍攻年餘野戰百餘次攻城三十餘次我軍受傷及陣亡者千餘名在事統帶各員備歷辛勤其尤爲出力者相應開列請旨給予獎勵其餘在事出力各員弁容俟查明另行請獎各營兵勇俟稍休息卽當分撥進攻撫建協勦新淦吉安補用直隸州知州劉騰鴻紀律嚴肅謀勇兼優攻勦瑞郡該員之力居多本擬保舉知府並加道銜乃功在垂成因傷殞命深堪痛惜應請旨飭部將劉騰鴻照道員例從優議卹並於瑞州府建立專祠藍翎把總谷文勝臨陣捐軀亦請從優議卹上諭該逆自五年冬間竄踞瑞州官軍設法圍攻備歷辛勤所

有尤爲出力之卽選副將普承堯著記名以總兵用並賞給扎薩克圖巴圖魯名號廣東南韶連道吳坤修著賞還花翎文童劉騰鵠著以知縣遇缺卽選並賞加同知銜賞帶藍翎從九品劉騰鵠著以知縣儘先選用並賞加知州銜升署四川順慶營遊擊劉國斌著以參將儘先補用其餘在事出力員弁兵勇著耆齡查明保奏○諭昨據御史尹耕雲奏宗人府刑部會審行劫案內有宗室忠能未經正法請照嘉慶年間喀勒明阿之案勒令自縊當交惠親王等查議具奏茲據查案進呈喀勒明阿係移居宗室所犯強姦良婦之案係屢次圖姦復加毆侮與忠能之入夥行強並非羣劫者不同宗室罪名止於絞候斬候本無立決之條今忠能已革去本身宗室綁赴市曹看視行刑復加重責發往黑龍江牢固監禁已與斬絞人犯監候者無異並諭令該將軍如該犯不安本分

卽行正法實係準情酌理務得其平並未過爲寬縱該御史所奏
著毋庸議嗣後宗室犯案爲曲法施仁致滋疏縱○予江西陣亡直隸州
知州劉騰鴻祭葬世職如道員例瑞州府城建祠○甲寅諭軍機
大臣等前據譚廷襄奏直隸順德廣平各屬與豫東交界地方有
游匪勾結土匪滋擾經該督調兵捕拏並委清河道董醇前往督
辦因思該處本年被旱成災貧民因覓食維艱以致藉端滋事匪
徒固當嚴辦其被難貧民尤應妥爲安撫見雖帑項支絀而地近
畿疆亟應力籌安輯應如何設法籌款賑恤之處著該督酌議章
程卽責成該道董醇督同地方官妥爲辦理以濟窮黎而免生事
候補副將達年管帶官兵五百名前由景州移駐天津見在該處
地方安靜應否飭令該副將帶前項官兵赴順廣等處以資彈壓

並著該督體察情形調撥將此諭令知之○署直隸總督譚廷襄奏遵旨查辦梟匪見飭各州縣分路兜擒嚴究黨與地方已漸安靜得旨仍著實力捕拏勿令隨處嘯聚卽山左匪徒亦應越境協緝莫分畛域○乙卯諭軍機大臣等慶英等奏葉爾羌回城等處擊賊解圍按捕餘匪情形一摺此次賊匪圍困葉爾羌漢回兩城經慶英等派遊擊德祥等帶兵出擊連獲勝仗賊蹤披靡散竄並探知巴爾楚克撲城之匪疊受懲創因知官兵已到圖木舒克軍臺該匪等張皇逃遁軍威大振見飭兵勇復由瑪瑣一帶按捕餘匪疏通和闢道路勦辦甚爲得手惟喀什噶爾及英吉沙爾兩處賊勢如何尙無確信亟應催集官兵趨程前進以解城圍據慶英等奏西路賊黨聚集尙多兵力僅止二千餘名未敢輕進見在烏魯木齊及喀喇沙爾蒙古各兵計日可到葉爾羌著法福禮迅卽

督帶前往英吉沙爾等處進剿毋稍延誤致失機宜其葉爾羌城圍已解並著慶英等將餘黨按除淨盡務絕根株將此由五百里各諭令知之○予廣東被戕府經歷易紹勳祭葬世職○丙辰以捐輸軍餉永廣湖南文鄉試中額四名長沙安福湘潭三縣學額各十名善化九名醴陵六名湘陰五名瀏陽邵陽新化澧各四名甯鄉安化保靖各三名益陽湘鄉各二名攸衡陽清泉衡山武岡平江武陵桃源漵浦慈利各一名○丁巳以克復貴州思南石阡思州松桃安化印江玉屏青谿府廳縣各城賞守備吳永清花翎餘升敘有差○予安徽陣亡知府畢大鈺等祭葬世職○戊午祭大社 大稷○己未諭軍機大臣等文祥奏滇省軍務緊急請

迅撥餉需並飭四川再撥兵二千名來滇助剿一摺前據吳振棫奏稱挑兵二千名帶往撥銀五萬兩解赴雲南省城並另籌銀五

萬兩隨同川兵行走此項官兵當已陸續啟程四川赴滇之兵先後調派已有三千餘名此外恐難再撥文祥因省城防勦喫緊於賓居一路抽撥兵練一千名赴援該提督所帶兵力較單著俟川兵到滇後即將所派兵練撤回以資勦辦西路道途梗塞軍餉支絀自係賓情見在川省其撥銀十萬兩著吳振棫酌量分撥解赴文祥軍營毋令缺乏該提督惟當就見有兵練奮力勦擊並設法疏通道路務使與省城聲息相通互爲策應吳振棫卽飭帶兵各員兼程前進毋稍延誤將此由六百里各諭令知之○諭李孟羣奏拔營進攻六安州城請調邱聯恩一軍協勦等語李兆受張落刑等逆黨見由霍邱正陽陸續竄至六安州該藩司所帶兵勇僅四千餘人分紮西南兩路恐有顧彼失此之虞惟前調容熙馬隊已由伊興額帶往見在畱防徐州此外無可調撥至邱聯恩一軍

前據英桂等奏見派在三河尖等處扼要駐紮能否撥往李孟羣
軍營著英桂與勝保袁甲三會同商酌設或不能調往卽另派得
力將弁分帶兵勇前往六安助勦再前據福濟等奏鄭魁士已帶
兵前赴六安援應並以疏通餉道著迅速前進與該藩司併力夾
攻不至因兵單困守至李孟羣營中需餉甚急除英桂連次協濟
外各省奏撥皖餉業經起解者尙有數起著福濟隨時分撥毋令
缺乏將此由六百里諭知英桂勝保袁甲三福濟鄭魁士並傳諭
李孟羣知之○庚申予江西殉節縣丞胡履震等祭葬世職○撥
寶鈔六十萬串修補洪澤湖及南北運河各工○壬戌官文胡林
翼奏黃州官軍進駐蘄水臣官文調參將李濟清督帶長龍三板
等船十餘號駐紮蘄水之蘭溪及對岸黃石港等處杜賊偷越臣
胡林翼於七月二十二等日率各師駐紮蘄水之月山偵知各

鄉村踞賊不下數萬又新添安徽悍賊萬餘來援二十三日我軍安營甫定賊分左右中三路來撲又另分數支搖旗呐喊勢極兇悍李續宜唐訓方等分率各軍嚴陣以待俟賊至山腳用礮轟擊團勇亦奮力齊進斃賊多名餘賊敗竄時馬隊分三路衝突臣胡林翼亦督親兵且戰且進齊撲賊壘李續宜與何紹彩會合舒保馬隊夾擊直擣賊巢槍礮齊施登時火光燭天延燒賊壘六十三座並賊屯糧之所一燼而空焚殺及淹斃之賊五千餘名馬步渡河追擊又連破賊壘僞城五座擒斬賊目僞檢點僞指揮等二十四名奪獲槍礮器械無數二十四五六等日復分路出隊馳赴界嶺曹家河等處追剿逆賊望風披靡又被我軍殲斃二千餘名是役也我軍於數日之中剿除賊壘六十餘座殺賊七千有奇馬隊又追勦百餘里實皆仰賴 聖主威福將士用命見仍乘勝下勦

以期節節埽蕩會攻九江其在事尤爲出力人員相應請旨給予獎勵出自聖恩此外出力兵勇應請擇尤保奏伏候聖裁

上諭內閣此次移營進剿竄賊斬馘甚多著官文等嚴飭帶兵將弁乘勝下剿節節埽蕩以期會合諸軍迅克九江府城毋稍延緩

○駱秉章奏准江西撫臣

鈔送克復龍泉縣城摺稿專據副將周

鳳山稟報於桂東一軍屢次攻剿及用閒誘降收復城池實在情形未經聲敘明白臣見確知其詳不敢不爲皇上一一陳之桂

東一軍劉拔元胡兼善吳齊源等二月二十五至三月十四等日

屢次剿賊殲斃甚多十六日大破賊於君子壠燒賊營三座斃賊

四百餘名二十八日追賊石圍四月初四日剿賊五斗江共斃賊

五六百而龍泉北鄉賊氛漸熄吉安援賊圍撲城南老營情形萬緊胡兼善聞警往援行抵藻林距老營尙二十餘里聞知縣劉拔

元等已出隊擊賊被賊圍攻眾寡不敵血戰捐軀胡兼善率勇星馳行抵城南飛稟求援

臣

卽飭干總蕭紹鈴率所部勇六百急赴

龍泉又調桂東團練黃由謙等率團勇五百先往援應一面札飭吉安各軍就近分軍助勦而以劉拔元所帶中營之勇併歸胡兼善統帶初十日賊眾六七千來撲營盤胡兼善等擊卻之斃賊五百餘名二十三四五月初一等曰賊眾萬餘屢次出撲均經胡兼善等擊退初十日周鳳山始由萬安率鳳營抵龍泉城北一帶安營是日蕭紹鈴及桂東團練黃由謙等各率勇抵龍泉西南一帶安營連日派隊環攻城賊固匿不出出亦旋退二十七日萬安縣賊八百餘人來援龍泉周鳳山胡兼善等各派隊迎勦擒斬殆盡閏五月十四夜胡兼善營中幫辦武生胡達善巡哨至西門濠邊獲逃賊林積信至營訊以城中虛實據稱城內男婦大小約七八

千米糧不乏賊首爲武舉鍾起鳳廩生鍾毓靈等而尤以監生陳邦烈舉人張謙爲最胡兼善恐渠魁漏逸擬設計誘致之遂授以密計縱令入城十七日林蕡信縋城而下言城中諸賊見尙疑信參半胡兼善仍縱之去並諭令須偕賊首數人來次日賊首鍾起鳳等來營胡兼善仍好言撫之令鍾起鳳鍾毓靈雍髮留營鍾辰學仍畱髮與林蕡信復入城二十一日陳邦烈張謙亦至並有賊目劉相桂隨之胡兼善佯爲慰諭將七犯分羈各營許於二十四日棄械出城就撫二十二日胡兼善等同詣周鳳山營密告該首逆等均經誘出豫備傳單請其分諭各營一律遵照某起賊由某門出歸某營看守防護聽候分別查辦賊出之後不准兵勇入城搶取財物違者治以軍法周鳳山始知誘致之詳胡兼善歸營後令張謙等告知城中各賊准於二十四日卯刻出城屆期城內之

賊疑懼未化賊首張謙等願再致信城賊勸其速來是夜賊首劉金輝羅齋公劉名典等希圖夤夜偷竄適幫辦吳齊乙等巡哨至拏獲到營胡兼善仍釋勿誅復遣入城五鼓林積信又引出賊首鍾有漢溫日新陳邦英而劉金輝羅齋公劉名典三犯亦隨之出二十五日胡兼善等列隊各門城內賊眾按門棄械而出各營憤其抗拒日久除婦女老幼分別省釋外概與駢誅二十六日胡兼善始提首逆鍾有漢羅齋公溫日新陳邦英劉名典劉金輝正法二十七日又提首逆張謙陳邦烈鍾起鳳鍾毓靈劉相桂五犯磔死惟林積信卽林崧生鍾辰學兩犯胡兼善等許以戴罪立功稟請批示辦理臣飭令安爲安插以示法外之仁此收復龍泉縣城當城賊二十五日出城之時各營止列隊城外並無攻城之事乃

捏稱派隊環攻緣梯登城奮力巷戰在城中分路截殺等情賊首
羅齋公本萬安著名齋匪劉金輝本龍泉起事首逆經胡兼善於
復城後次日提出正法乃捏稱羅齋公於入城時殺斃劉金輝改
過自新請免死罪畱營效力至逆首張謙陳邦烈鍾起鳳鍾毓靈
等原係胡兼善遣降賊林贊信誘致到營乃該副將稟稱胡兼善
之勇其中常有兄弟在城爲賊又有哨官陳姓與賊逆張謙有師
生之誼顯係心懷忌嫉希圖要功臣前於該副將稟報克復龍泉
時已深疑其不中情事大加駁飭以胡兼善等必兼稟江西彼此
互勘是非自明不料胡兼善未及具稟江西該副將得以任意捏
造虛詞肆其欺罔見據管帶湘勇候補道王鑫就近體訪稟請查
辦所稱該副將欺飾要功等情與臣所聞大略相同仰懇飭下江
西撫臣查明更正從嚴參辦以明賞罰而勵軍心至由湖南陸續

調赴龍泉各營紳勇在事既久頗著微勞可否由

臣

覈明彙案保

獎之處出自聖裁又奏據王鑫稟報自勦敗廣昌縣古夏東山

壩巨股賊匪後餘賊之竄踞頭陂者旋竄廣昌縣六月十七日王

鑫拔營追之賊分五路拒敵官軍亦分路進剿賊大敗走躡蹤緊

追忽逆首僞國宗楊姓率眾萬餘自甘竹來接應敗賊回拒都司

張騰霄躍馬衝鋒潮勇一齊猛撲賊復大敗追至南豐縣界甘竹

地方始行收隊是戰斃賊約近三千生擒悍賊一百十三名回軍

廣昌縣城而前派赴樂安之千總朱惟堂亦與張騰霄及知縣孫

效曾於十九日收復樂安縣城王鑫方擬直擣撫州建昌兩郡忽

吉安城賊攻陷周鳳山營盤其趙煥聯劉培元兩營亦因而被陷

僅吉字營全軍無損退保安福縣城王鑫聞警遂輶撫建之行還

軍永豐縣屬恭田按兵觀釁七月初八日朱惟堂飛稟僞國宗洪

楊諸逆率撫建賊數萬竄宜黃崇仁兩縣將趨樂安王鑫得報捲
甲星馳次日已刻抵樂安縣城偃旗息鼓令賊不覺一面暗催團
練聽候調遣十一日未刻援賊八九千人已至南門外距城僅半
里王鑫發暗號伏兵四面齊出大呼猛撲賊駭而奔我軍窮追四
十餘里至甘泉墟計共斃賊五六千始收隊十二日王鑫親率所
部出太平市甫行十五里賊前隊六七千已到王鑫分所部擊之
賊大敗追至太平市賊大隊二萬餘盡出接應各勇大呼衝擊追
殺三十里至客馬塘是戰斃賊四千二三百名而竄伏山林爲團
丁搜殺者亦二三千時僞國宗楊逆有眾三萬尙屯林頭地方賊
之敗回者往與會合十四日王鑫出隊擊之賊列大隊於草岡左
右張兩翼來迎王鑫爲長蛇陣偏之縱勇奮擊噴筒槍礮齊發復
令箭牌數十從後滾出揮刀亂斫賊大奔潰窮追三四十里始回

軍至崇仁屬之鳳岡墟宿焉是戰殺賊一萬二三千人生擒四百餘名王鑫擬乘破竹之勢進規撫建然吉安敗後未能圍攻設令城賊逸出肆擾則一軍孤懸四面受敵餉道堪虞該員一軍援勦江西自擊賊水東至太平市之戰共獲大捷十二斃賊四萬數千江西大局賴有轉機正宜加意保護俾獲殄寇歲功以紓聖慮此軍月餉軍械子藥臣與總局司道籌商按時措解接濟俾得意圖成無憂缺乏維是道路相距愈遠自吉安官軍潰挫時有梗阻之虞見在解餉兩批未知能否徑達合無仰懇皇上飭下江西撫臣儻遇湖南委解未到該軍餉項匱乏速由江西省籌解以資接濟上諭軍機大臣等前據耆齡奏已革副將周鳳山督兵攻克龍泉縣城當經降旨將該員開復原官遇缺卽選並賞還花翎矣本日據駱秉章奏該副將心懷忌嫉欺飾要功旣經駱秉

章訪得實情著耆齡卽行確查嚴參據實更正以懲欺冒者齡未經接據胡兼善等稟報以致無從詳悉亦無所用其回護駱秉章摺著鈔給閱看又據另片奏王鑫一軍擬由崇仁進剿撫建湖南所解兩批餉銀因吉安敗後道路梗阻恐一時不能徑達請飭江西酌量接濟等語並著耆齡將王鑫軍營需用餉項軍械子藥先由江西省局籌解接濟毋使稍有缺乏將此由五百里諭令知之

○諭本日據駱秉章奏王鑫一軍赴援江西餉道梗阻請飭江西就近撥解軍餉接濟已諭令耆齡速籌協濟所稱周鳳山於克復龍泉縣城有冒功情事並已諭令耆齡查辦至湖南派赴龍泉之官紳兵勇從征日久著有微勞卽著駱秉章查明保奏其克復興安案內除蔣益澧等各員本日已由勞崇光保奏外其餘出力各員仍歸駱秉章查明保奏丁憂侍郎曾國藩前經降旨准其暫行

在籍守制儻江西軍務緊急或他省有需人之處仍著候旨前往
昨據給事中李鶴年奏曾國藩自丁父憂疊蒙賜金給假褒獎慰
留此後墨經從戎宜爲天下後世所共諒豈容以終制爲守經再
三瀆請應飭仍赴江西及時圖報等語軍務奪情原屬不得已之
舉朕非必欲該侍郎卽入仕途然如該給事中所奏亦可見移孝
作忠經權並用公論自在人心見在江西軍務有楊載福統帶雖
無須曾國藩前往而湖南本籍偏近黔粵賊氛未息團練籌防均
關緊要該侍郎負一鄉重望自當極力圖維急思報稱所有李鶴
年原招著鈔給閱看將此諭知駱秉章著傳旨諭令曾國藩知之
○諭英桂奏需用馬匹請飭於近省購解等語豫省見在勦辦皖
捻並角子山股匪全恃馬隊鈔擊見在該營馬匹倒斃甚多自應
就近購買陝西爲產馬之區著曾望顏飭屬採買廝壯馬四百匹

委員迅速解送英桂軍營以資攻勦此項馬價卽於陝西省欠撥河南銀四千兩零項下如數扣除將此由五百里諭令知之○官文奏黃州官軍移營進剿連戰皆捷都興、阿楊載福李續賓李續宜多隆阿舒保等六員厥功甚偉其智謀勇略皆足以當大任相應據實密陳以備簡用得旨俟楚北軍情稍鬆大兵東下之時朕酌量擢用以期得力○駱秉章奏候補道王鑫馳勦吉安水東援賊屢獲勝仗正擬先勦樂安縣藤田地方忽探報賊目僞將軍潘姓楊姓及蕭復勝率賊數萬續由甯都來援吉安距沙溪不遠王鑫以賊眾已近沙溪則吉安可危而藤田後路亦梗遂輒樂安之行於十九日率四成隊一千二百人由藤田馳赴沙溪二十日有賊萬餘前來搦戰其氣殊驕王鑫靜以待之密令王文瑞等分設伏兵王文瑞先與賊遇斬首二百餘賊遂紛紛敗走王鑫從左

路追之圍賊山坡殲斃六七百名官軍追至韶源賊眾駭走王金
縱火徧燒村壘一面分五路急追之至上固隘口賊返戈抗拒官
軍直前衝突則又鳴水敗逃官軍復追過河至貓公嶺始收隊而
返是日斃賊約兩千餘生擒賊數百破賊壘三十餘處旗幟軍械
輜重山積敗賊竄至甯都州屬之釣峰收合餘黨眾尙數萬王金
念此股不急剿除終爲後患遂連日拔營追之二十六日令王開
化等分路進剿自率兩旗勇由中路進行近釣峰見該逆蠭屯蟻
聚村墟皆瀕墟前近水兩岸徧紮賊營王金令先攻墟內之賊王
文瑞等由墟後包鈔王金親督弁勇由街口殺入旗長蕭名聲等
冒險直衝立斬悍賊數十該逆自相踐踏死者數百各勇直前亂
砍斃賊無算陣斬僞總制廖逆追出街口餘賊將向江洲逃竄適
王文瑞從街口鈔來圍而殲之官軍之潛襲賊營者復縱火焚巢

賊折奔江洲官軍緊追斃賊二三百名王鑫令王文瑞等乘勝齊進同時縱火賊被逼溺斃者無算賊目蕭復勝策馬而渡湘勇李文翊斬之而奪其馬約其殺賊二千六七百名救出婦孺難民約近萬人而官軍一千二百人無一傷亡者王鑫軍至小源適會匪頭目謝芸標一股竄至廣昌縣屬頭陂地方賊目僞國宗伍復勝率眾數千由廣昌竄至會於古夏圖擾甯都王鑫率眾襲之六月初一日抵古夏賊眾負山面溪而營王鑫令張運蘭等帶旗勇伏於山後自率親兵十餘騎至溪邊誘之賊見王鑫護從人少急分數路躡淺而渡王鑫退至山坡鼓聲大震山後伏兵突出賊反旗而奔張運蘭之勇已衝渡水南鈔出賊後官軍前後夾擊斃賊數百餘賊潰竄王鑫縱勇窮追沿途斬殺七八百名是役共斃賊一千三四百名生擒僞總制楊洸蕷及賊目數名初二日福建敗賊

回援吉安前隊已抵東山壩王鑫令王文瑞等由右路沿河而進
親督王開化等過河由左路進初三日右路之勇已抵坪田張運
蘭復分各勇爲三路賊覘官軍人少排列以待官軍奮威衝殺斃
賊百餘賊始敗潰官軍一面追賊一面圍住該村賊黨衝出者盡
爲官軍所殲並陣斬賊目張悰相曹信照於馬上餘賊敗潰王鑫
督官軍由左路進離東山壩里許適賊聞右路之敗蒼黃鼎沸王
鑫令王開化等急擊之賊大敗走官軍夾擊斃賊四五百名王鑫
令各營分路窮追斬賊目陳耀南餘賊辟易張運蘭殲賊大半共
計斃賊三千餘名據王鑫稟僞國宗楊逆後隊賊眾二萬餘已抵
廣昌縣之頭陂地方相距僅三十里僞國宗洪逆亦來會合恐尙
有數次大戰而撫建兩郡之賊聞尙有十數萬之多樂安新淦亦
均有大股屯踞擬卽相機酌辦次第翦除臣惟王鑫自馳勦水東

援賊以來月餘之久轉戰數百里前後屢獲大捷而所部湘勇僅有三千酷暑過征勞頓殊甚況賊匪多至百倍近更添由閩回竄巨股誠不可視之太輕致有他慮見飭在籍都司王開僖千總張廣勝等迅募湘勇千名陸續前赴王金行營聽其挑補更換並札飭管帶桂東勇之訓導胡兼善於龍泉軍營挑精勇五百馳往助勦報聞○以捐輸軍餉永廣河南文鄉試中額二名祥符縣學額九名淮甯溫各四名固始二名蘭儀洛陽武陟西華項城太康尉氏濟源宜陽新安許甯陵睢河內孟扶溝商城各一名○以黃州官軍勦賊獲勝賞知府李續宣副將張文煥巴圖魯名號餘升擢有差○予廣西被戕知縣宋炳璜祭葬世職○癸亥諭內閣本年直隸省二麥歉收並積水未消之區業經降旨加恩停緩錢糧惟念入夏以來蝗蝻閒作順德廣平府屬被旱較重大名府屬復多

被水之處小民生計維艱自應酌籌撫恤前經諭令譚廷襄酌議
章程妥爲辦理茲據奏稱委員查勘晚禾穀豆尙未一律刈穫災
分尙難懸定先行通飭所屬減免差徭並散放社倉義穀儻有不
敷再由藩司籌款酌放折色等語均著照所議辦理其所請頒發
官票銀五十萬兩著戶部卽行如數發給俾得通融酌劑以充賑
款餉需仍著該署督飭催各屬委員勘定秋災分數奏請恩施用
副朕軫念民依至意○諭葉名琛奏廣西股匪攻陷南甯等府縣
城池並高廉各屬堵勦獲勝一摺廣西土匪李七等糾眾肆擾數
月之間疊陷郡邑城池實屬罪大惡極經廣東兵勇疊勦獲勝仍
著葉名琛督飭高廉等屬文武會合廣西官兵殲除匪眾迅圖克
復毋令蔓延廣西左江鎮總兵色克精阿左江道吳德徵未能先
事豫防代理橫州知州羅定霖代辦南甯府事兼理宣化縣知縣

蘇在中不能力保城池均著革職仍畱軍營效力○勝保奏臣前
因後路太單函致袁甲三帶兵移禁以壯聲勢嗣據函覆韓奸餘
孽尙未淨盡未能迅速前來臣見攻正陽關正在喫緊前敵兵勇
尙慮不敷斷難顧及後路沙河以北伏莽未清時虞竊發設乘虛
窺伺掣動大局關繫非輕正躊躇間據潁上縣知縣程鈺等稟稱
鳳臺縣境內苗家寨生員苗沛霖練眾萬餘滋擾謝家橋展溝等
處聲言在該處築圍查展溝闕疃一帶本爲捻巢今苗沛霖借圍
練爲名到處均糧心懷叵測若再勾結恐成尾大不掉之勢惟從
前捻逆竄擾鳳懷一帶苗沛霖曾經督圍邀擊心尙可原此時旣
未顯形叛逆之迹不能不暫示羈縻且大股捻氛尙未殄盡兵力
亦難兼顧當飭鳳臺縣知縣李霖持臣手諭前往開導一面密飭
潁州府知府才宇和督同程鈺妥爲撫馭俟稟覆到日再行籌辦

是沙河以北地方儻無兵力實啟狡焉思逞之心相應請自飭下袁甲三剋日帶兵南來擇要扼守或分兵在展溝闕疃一帶繁營設法控制臣營可免腹背受敵之虞 上諭軍機大臣等前經疊

次諭令袁甲三速赴正陽將渦北韓圩之賊交史榮椿朱連泰督勦計此時早已接奉諭旨何以尙未啟行見在英桂已於初九日啟程回省潁州一路僅有顏懷忠等壯勇數百名正陽後路空虛已甚況沙河以北伏莽未清土練復心懷叵測亟應速籌控制著袁甲三卽行督帶兵勇馳往正陽所有渦北各匪著仍遵前旨交史榮椿等分路搜捕毋再遲延至另片奏請由河南山東山西各先撥銀二萬兩仍每月各撥銀二萬兩等語殊屬不知撙節前此英桂在潁勦捻餉需皆由河南接濟今該撫暫行離營並非不與其事勝保旣欲河南濟餉仍可向英桂商辦何待請旨飭撥豈英

桂離營卽置軍餉於不問耶至山東山西應解京餉甘餉楚皖各
餉數目繁多勝保豈不知之當此籌餉維艱之際而隨地募勇動
以千計安得不倍形支絀况募勇易而遣散難流弊甚多從前勝
保在山東卽因不能約束川勇致有搶掠村莊之事前車之鑒亦
當自知勝保屢次奏報皆言功在垂成而此次忽請按月撥餉似
將爲曠日持久之計何以慰朕盼望所請撥餉著英桂傳諭藩司
瑛棨仍由河南源源接濟不得以該撫離營稍存膜視此外惟山
西省尙可湊撥已諭令恆福酌量籌解然該省撥款過多亦不能
按月接濟也勝保袁甲三當力圖進剿俟克復正陽後卽行酌撤
募勇以節經費將此由六百里諭知英桂勝保袁甲三並傳諭瑛
棨知之○諭見在英桂帶兵赴西路禹密一帶搜捕竄匪勝保仍
督兵進剿正陽山西省前撥解河南餉銀五萬兩業經支發無餘

當此喫緊之時自應寬爲籌畫除諭令英桂仍由河南省撥項接濟外著恆福再行酌量籌撥銀數萬兩委員解赴勝保軍營以資軍食毋稍延緩將此由五百里諭令知之○予安徽陣亡縣丞李光豫等廣東殉節知縣刁汝元等祭葬世職○甲子以福建省城團防出力賞在籍尙書銜太常寺卿廖鴻荃等花翎○乙丑諭軍機大臣等本日據都察院奏山東費縣民人宋德基以幅匪劫殺等情具控鄰城等處匪徒滋事疊經諭令崇恩派撥官兵會同徐州兵勇勦辦嗣據該撫奏稱鄰邳等處肅清及蘭山費縣一帶已派有兵勇駐紮防勦匪徒當不至橫行茲閱該民人呈詞內稱幅匪李希夢等結黨千餘人先在蘭山鄰城地方劫掠因官兵挫敗突入費縣肆行焚殺分擾蒙陰沂水並聞宿遷之匪竄入蘭鄰境內將與費縣賊匪合夥等語此股匪徒勢已蔓延且宿遷嶧縣等

處均有匪徒滋擾業據邵燦等奏報何以未據崇恩將堵勦情形
入奏見據該民人宋德基將幅匪頭目姓名住址開單呈控著鈔
給崇恩閱看該撫接奉後卽飭兗沂曹濟道達鏞並兗州鎮將等
迅速將各股匪首嚴密查拏按名弋獲毋令漏網並派撥兵勇會
同各該地方將夥黨按勦務使一律肅清儻意存掩飾致釀巨患
該撫恐不能當此重咎也將此諭令知之○賡福以病免以肅順
爲理藩院尙書瑞常爲左都御史調文清爲吏部左侍郎以玉明
爲禮部左侍郎由副都統遷○丁卯調文煜爲江蘇布政使辦理江南
軍營糧臺楊能格爲江甯布政使辦理江北軍營糧臺○戊辰諭
內閣端華等奏聯順呈遞親供並見訊各情一摺聯順供詞與眾
不符之處仍著端華等詳細研鞫以成信讞至八旗步甲查出空
缺有一千五百餘名之多自應急籌挑補以重地方著步軍統領

衙門再行確查按名挑補足額並妥議章程以杜虛報冒銷之弊
○山西巡撫恆福奏遼州有河南匪徒勾結飢民擅進黃澤關黎
城縣屬偏城鎮地方亦有河南匪徒闖入見派官兵前往相機辦
理兼資彈壓得旨飭令迅速彈壓驅逐勿令到處滋擾○己巳諭
內閣前據御史那清阿奏署兩淮鹽運使郭沛霖徵收淮南稅課
日形短絀並信任泰州運判洪國柱冒領庫銀侵蝕稅錢代爲彌
縫等語當交何桂清趙德轍查明具奏茲據奏稱泰州運判洪國
柱聲名本屬平常咸豐三年因辦理防堵領過淮南總局墊發商
人捐輸銀二萬兩事閱四年之久既未將用項隨時呈報又延不
造冊請銷難保無侵蝕入己情弊洪國柱著卽革職交署鹽運使
聯英責令將所用銀兩趕緊逐款報銷並確查分撥儀徵縣銀有
無實在憑據儻有侵那等弊著卽嚴審治罪郭沛霖因洪國柱那

用稅錢當將撤任勒追尙無代爲彌縫情事著俟案結時另行具奏○諭前據英桂等奏軍營保舉各員請准其開單請簡並在營候補等語當經降旨令該部議奏茲據吏部遵議具奏各路軍營打仗出力人員原准保奏記名以道府用遇缺請旨簡放其辦理糧臺文案各員業經奏定章程不准保奏記名簡放其從前記名各員著仍遵前旨俟軍務告竣送部引見再降諭旨英桂等援在營候選之例仍請開單簡放之處著毋庸議其軍營候補人員本准按班序補惟投效軍營旋卽保奏另指他省各項文員例應赴部分發引見方准赴所指之省按班序補若於未經到省之先卽令其在營候補不但員缺虛懸且開取巧之弊嗣後軍營投效人員無論何項勞績保奏另指他省者均著俟軍務告竣給咨送部引見到省後再行按班序補該撫等所請在營候補之處亦無庸

議○諭軍機大臣等本日據法福禮奏後路官兵行抵葉爾羌卽統帶進剿一摺喀什噶爾英吉沙爾兩城被圍已經三月亟應督兵救援見在所調官兵到葉爾羌者已足五千之數諒已足敷剿辦所有備調之烏魯木齊官兵一千五百名著毋庸再調以節糜費此次回匪滋事多係烏合之眾一經官兵勦擊卽紛紛逃竄若能乘此聲威奮力迎擊當可剋期殄滅據稱葉爾羌復有賊匪滋擾經官兵擊敗之後尙未遠颺著法福禮等督飭官兵前進仍沿途搜剿餘匪並確探喀英兩城情形迅速剿辦毋誤事機至該匪等一經剿敗逃竄出卡難保不去而復來如能設計鈔襲使其大受懲創方足以褫賊膽而固邊疆著該大臣等妥籌辦理此次法福禮所保各員均屬從優念其初次接仗卽獲大勝是以悉照所請獎勵嗣後保舉出力人員不可失之過優以杜冒濫將此由五

百里各諭令知之○以江蘇山陽縣捐輸軍餉取廣學額四名○
庚午諭內閣前聞江蘇在籍中允馮桂芬有徇庇捐戶等情事當
經諭令何桂清查明參奏茲據奏稱訪查馮桂芬鄉評毀譽參半
其勸捐吳江縣太湖廳兩處均會同眾紳公議尙無包庇情事惟
紳士辦理地方公事必須輿情推服該員既因勸捐致招物議著
勿庸辦理省城局務○以沈桂芬爲內閣學士由少詹事遷○辛未諭
內閣何桂清晏端書奏提鎮大員在營丁憂請畱辦軍務一摺浙
江提督鄧紹良陝安鎮總兵秦如虎先後俱丁母憂見當勦辦喫
緊之際未便遽令離營鄧紹良秦如虎均著毋庸開缺卽作爲署
任仍畱皖南辦理防勦事務鄧紹良俟軍務稍平再行奏請給假
回籍治喪秦如虎屆時著該督等酌量奏明辦理○諭晏端書奏
海塘埽石各工作情形金衢嚴處等屬同時起蛟致將西塘埽工

衝坍數處均已過水浙江省海塘爲本省杭嘉湖及蘇松常鎮七郡
田廬保障攸關緊要著該撫嚴查道廳各員將已坍者趕緊搶築
未坍者設法保護毋得再有疏虞至全塘各工此次潰損甚多並
飭承辦各員分別賠修該撫仍隨時親往巡勘以期及早歲功其
被水處所並上游被蛟較重之區淹沒人口田廬著飭屬查勘具
奏所有防護不力之署西防同知邢吉甫海防營守備周金標均
著革職留任署杭嘉湖道葉埜著交部議處晏端書著一併議處
○壬申諭軍機大臣等德興阿翁同書奏連日防勦瓜州情形水
陸獲勝一摺前因和春等移督重兵圍攻鎮江壘經諭令德興阿
等水陸大舉與和春合力圖功先拔瓜州俾鎮城可以得手乃本
日覽德興阿等奏報自七月二十八日至八月十一等日所稱壘
次水陸環攻獲勝情形不過小有斬擒卽行收隊賊匪旣未大受

徵創克復仍屬毫無把握若必待賊匪竄出始行勦擊則彼必藏匿堅守以老我師何日始能擣其巢穴著該大臣等嚴飭將士奮力進攻志在必克毋再遷延時日致生他變至傳聞石逆遣黨分路下竄係聲東擊西之計亦未可知惟賊情詭詐自當於浦口六合等處嚴密設防所呈水礮臺圓水落時恐不利於運用必當趁此江潮尚旺之時轟擊方能得力見在南岸大兵雲集惟江路未絕接濟該大臣等卽一面督飭水師斷其江中援應一面激勵將士約會南岸諸軍同時並舉使該匪不能兼顧不但瓜州可克並可遙作鎮江聲援明知餉需短絀軍士疲勞豈可坐失機宜有負委任將此由六百里諭令知之○癸酉諭內閣英桂奏請覈實清釐州縣交代一摺河南連年辦理軍務兼以更調頻仍各州縣交代多逾例限尙屬有因著照所請准將從前交代逾限各員處分

加恩寬免惟倉庫攸關豈容任意延宕著該撫飭將各屬未結交
代在咸豐七年七月以前者卽以奉文之日起限一箇月一律算
清結報儻再遷延或查有虧那情弊卽行據實嚴參懲辦○諭軍
機大臣等李孟羣奏餉需告匱請飭四川按月撥銀三萬兩並請
由楚省鹽課先行墊解等語李孟羣一軍由楚入皖已抵六安該
處粵捻各匪聚勦辦正在喫緊餉需未容匱缺惟四川省奉撥
款項較多著有鳳斟酌情形卽不能如該藩司所請每月三萬兩
之數務卽速爲籌撥銀兩接濟並著按月解至荊州卽由官文等
飭令荆宜施道莊受祺妥爲轉解其川餉未到以前卽著官文胡
林翼於該省鹽課內先行籌墊解往俾得將欠發兵餉早爲散放
至楚省協濟李孟羣軍餉前曾諭令該大臣等於先解二萬兩外
仍源源接濟此時該藩司需餉孔殷並著官文胡林翼遵照前旨

速籌協濟將此由六百里各諭令知之○伊犁參贊大臣法福禮奏葉爾羌境內賊匪經官兵擊敗後復行嘯聚滋擾督兵迎勦接仗獲勝得旨逆回脅惑愚回不過志在搶掠一聞兵至飽飪而歸觀此情形恐真賊已潛出卡止賸被脅良回聚而難散欲歸不能欲降不敢若不隨勦隨撫勢必愈殺愈多見在兵力不爲不厚務須另分奇兵由閒道襲其歸路正兵多張旗幟以壯聲威庶幾成功較速不至餉虛糜兵徒勞也○乙亥諭內閣戶部奏參河南省應解京餉藉詞搪塞軍需用款並不報銷一摺河南省三次部撥銀共三百五十萬兩除解過連鎮等處銀三十萬兩外餘俱未解部庫經該部屢次奏催置若罔聞至軍需動用並不照部定章程按期造報任意延宕顯係借軍需爲名目以掩各屬虧那情弊該省額徵正雜錢糧甲於北省似此因循疲玩該大吏等天良安在

若不加以懲創何以重國帑而倣效尤河南巡撫英桂布政使瑛
槩均著先行交部議處所有應解京餉銀每月十萬兩著按期解
部毋許遲延其厯年軍需動用各款著勒限三箇月造冊報部覈
銷儻敢仍前延玩定將該撫等嚴懲不貸○丙子河南巡撫英桂
奏奉命移師回豫督勦西路竄匪見已馳抵許州催提後起兵勇
安籌進剿得旨匪蹤飄忽靡常追剿萬不能得力著嚴飭各府縣
合力堵截毋任其分竄以驅出本境爲了事也○丁丑諭內閣法
福禮奏克復英吉沙爾回城並漢城解圍大獲勝仗一摺賊匪占
踞英吉沙爾回城前經法福禮督兵在大橋獲勝後復在柳樹泉
地方遇匪數千官軍槍礮齊施並用馬隊擊退賊眾奎英帶同烏
魯木齊官兵兩翼馬隊轟潰前後伏賊乘勝追擊斃匪不計其數
奪獲馬匹軍械甚多當將回城克復其圍攻漢城之賊亦皆聞風

逃竄此次法福禮等勦辦踞城賊匪尙屬迅速著卽按捕逸匪督率得勝官兵進剿喀什噶爾殲除醜類肅清地方所有打仗出力人員及陣亡兵勇著該大臣等查明具奏○諭軍機大臣等據署安徽藩司恩錫奏皖省軍需短絀請於原撥協餉之外另撥整餉十萬兩等語已批令戶部迅速籌撥矣據奏皖省各路兵勇共計一萬八千餘名見在患病者有五六千人之多當此軍餉支絀之時留此疲病之兵攻剿不能得力徒糜糧餉於事無益况福濟等近日打仗止在廬州附近安用一萬八千之眾著卽督飭帶兵各員認真查覈將老弱及患病兵丁酌量裁撤歸伍以節餉需而收實用至該撫前次撤遣兵丁已諭令各原營照數補足此項兵丁諒亦陸續到營如查有疲弱者亦應一併裁汰毋令濫竽充數本日所奏水陸勝仗該匪並未大受懲創著卽激勵弁兵迅速攻剿

毋得以待餉爲名僅知保守廬州不思漸次肅清致千重咎將此由六百里諭令福濟鄭魁士知之○戊寅官文都興阿胡林翼奏官軍由蘄水進剿賊眾逃回宿太者約十餘萬而黃梅小池口僞城踞賊抗拒如故臣官文咨行楊載福都興阿等速拔小池口僞城撤其犄角臣胡林翼督所部各營並李續賓唐訓方等湘勇由上游蘄水蘄州而達廣濟黃梅節節按剿勢如破竹焚毀賊巢擒斬逆黨不可勝數八月初四日更餘臣都興阿令多隆阿鮑超各挑馬步隊伍分路潛進先襲燒其後山賊壘我兵四路衝擊蘿斃及落河淹死之賊甚多馬步各軍連夜追剿計沿途殺賊三千餘生擒百餘名正法奪獲大礮六十餘位擡槍器械無算天明追至桂家畈渡河橋復踏毀賊壘十餘座維時黃梅境內已漸肅清僅小池口賊窟尙死守待援也臣胡林翼遂令楊載福等移營進逼

晝夜環攻連毀賊堅壘數處十三十四等日楊載福李續賓等各營四面環攻十五日風雨大至該逆猶從城上暗施槍礮而我軍奮勵愈甚臣都興阿又派馬隊施放火器城內賊蓬登時火起煙焰迷天各勇四面俱上該逆捨命狂奔被我軍截殺無數奪門而出者復經巴克坦布等率馬隊分路窮追至一百八十餘里斬殺殆盡城內被礮擊死之賊堆積如山查黃梅小池口與潯城隔江對峙爲江皖入楚咽喉重地該逆踞此險要以通皖賊之聲援資九江之犄角今仰仗 聖主威福將士齊心用命得以拔此僞城盡殲醜類全楚肅清實足以彰 天討而快人心見卽派軍駐紮小池口以固全楚門戶探悉九江逆眾倍嚴守禦援賊日增臣等惟當督飭各軍相機進取迅埽逆氛所有在事出力員弁兵勇可否擇尤保奏 上諭內閣官軍掃蕩斬黃賊巢攻拔小池口其逃

竄餘匪復經巴克坦布等分路斬殺殆盡全楚境地一律肅清勦辦尙屬得手著官文等督飭在事文武乘此聲威攻克九江並分兵追剿逃竄宿太股匪以期迅埽餘逆疏通江路所有此次出力員弁兵勇著准其擇尤保奏候朕施恩○是月蠲緩福建長汀等二十三州縣及興糧廳等處被擾地方節年丁耗銀米減徵安徽亳州等九州縣及屯坐各衛災區漕米一成並緩徵旌德等四州縣節年新舊額賦有差